

四庫全書

集部

欽定四庫全書

文章辨體彙選卷四百五十五

明 賀復徵 編

銘九 誌感類

詩塚銘 明宋濂

番有奇男子曰魯修學詩李存先生先生以文雄江  
東獨才修修有詩朋十人皆緣情善賦番數罹兵燹  
修懼其詩失傳埏埴為甃刻瘞芝山中瘞已請太史

宋濂勒銘其上銘曰

河清嶽明効坤之靈何蕤綏兮蟲文龍章於榮其英以  
昌厥辭兮冥智欽真反諸至神薶黃墟兮洩為醴泉三  
秀千眠合貞符兮番山可夷番川可移道如初兮

斷香銘

鍾惺

斷香銘者銘吾友蜀人劉晉仲之婦尹氏之墓也君  
諱紉蘭敘州府宜賓縣人大叅尹子求先生之女也  
記己酉予以喪子狂走白門先生為南職方郎嘗為


余言其婿劉郎七歲能詩劉郎者給諫勿所公仲子  
即今所稱劉晉仲者是也安知其有女慧如是然其  
時猶然女兒習玩不知書既歸晉仲見晉仲妹文玉  
詞翰妙敏心悅而好之相與為友始讀書稍稍為詩  
精神起落常出人外佳處不必由思思者反是無關  
繫處久之從晉仲省尊公於燕由蜀江出峽由峽入  
江由江達運河峰樹逢迎烟日爭讓舟行遑緩可以  
為家得一意為詩其篇時全時缺缺則聽之缺於此

或全於彼有絃摧柱折援他琴以續之之意予讀其詩骨散神寒音節清巉如病葉偶然從風而墜或中胃之附枝翅鳴不能自致於地如暗泉之阨於石而不能自竟其響此斷香之旨也至燕亦有詩全缺如久之意忽忽無主有秋冬氣晉仲憂之曰我亦不知至是亦不甚作詩作亦不以示人晉仲檢其枕中所藏如其全與缺而存之頃之卒年甫十九鍾子曰世所不常有者才人所不可無者友才而為我友友

而為我婦婦而才相當晉仲以為能永乎不能永乎

銘曰

丈夫才而鬼瞰之矧其在女子之躬也好友在四方而造物或收之矧其在閨閣之中也劉子者憐才乎求友乎悼亡乎能尋香於落葉暗泉之間而跡其所終也乎噫



文章辨體彙選卷四百五十五

欽定四庫全書

集部

文章辨體彙選卷四百五十六

詳校官中書臣李彤

主事銜臣徐以坤覆勘

總校官檢討臣何思鈞

校對官中書臣吳垣

謄錄監生臣劉天倫



欽定四庫全書

文章辨體彙選卷四百五十六

明 賀復徵 編

頌

以下散體

劉勰曰四始之至頌居其極頌者容也所以美盛德而述形容也夫化偃一國謂之風風正四方謂之雅容告神明謂之頌風雅叙人事兼變正頌主告神義必純美原夫頌惟典雅辭必清鑠敷寫似賦而不入

華侈之區敬慎如銘而異乎規戒之域揄揚以發藻  
汪洋以樹義纖曲巧致與情而變其大體所底如斯  
而已 吳訥曰詩大序曰詩有六義六曰頌頌者美  
盛德之形容以告神明者也嘗考莊子天運篇稱黃  
帝章咸池之樂姦氏為頌斯蓋寓言爾故頌之名寔  
出於詩若商之那周之清廟諸什皆以告神為頌體  
之正至如魯頌之駉閟等篇則當時用以祝頌僖公  
為頌之變故先儒胡氏有曰後世文人獻頌特效魯

頌而已 復徵曰按後世所作諸頌皆變體也其體不一有謠體有賦體有騷體有箴銘體有散文體不能各分或注題下一二使讀者自別云

聖主得賢臣頌

漢王褒

夫荷旃被毳者難與道純繇之麗密美藜含糗者不足與論太牢之滋味今臣僻在西蜀生於窮巷之中長於蓬茨之下無有游觀廣覽之知顧有至愚極陋之累不足以塞厚望應明旨雖然敢不略陳愚心而抒情素記

曰恭惟春秋發五始之要在乎審己正統而已夫賢者  
國家之器用也所任賢則趨舍省而功施普器用利則  
用力少而就效衆故工人之用鈍器也勞筋苦骨終日  
矻矻及至巧冶鑄工將之樸清水淬其鋒越砥斂其鍔  
水斷蛟龍陸剗犀革忽若彗汜畫塗如此則雖離婁督  
繩公輸削墨雖崇臺五層延袤百丈而不溷者工用相  
得也庸人之御駕馬亦傷吻敝策而不進于行胸喘膚  
汗人極馬倦及至駕齧膝駭旦旦王良執靶韓哀附輿

縱騁馳騫忽如影靡過都越國蹶如厯塊追奔電逐遺  
風周流八極萬里一息何其遼哉人馬相得也故服絺  
綌之涼者不苦盛暑之燠鬱襲狐貉之煖者不憂至寒  
之淒愴何則有其具者易其備賢人君子亦聖王之所  
以易海內也是以嘔喻受之開寬裕之路以延天下之  
英俊也夫竭知附賢者必達仁策索人求士者必樹伯  
迹昔周公躬吐握之勞故有囿空之隆齊桓設庭燎之  
禮故有匡合之功繇此觀之君人者勤於求賢而逸於

得人人臣亦然昔賢者之未遭遇也圖事揆策則君不用其謀陳見悃誠則上不然其信進仕不得施效斥逐又非其愆是故伊尹勤於鼎俎太公困於鼓刀百里自鬻甯子飯牛離此患也及其遇明君遭聖主也運籌合上意諫諍即見聽進退得闕其忠任職得行其術去卑辱與濫而升本朝離疏釋蹻而享膏粱剖符錫壤而光祖考傳之子孫以資說士故世必有聖智之君而後有賢明之臣虎嘯而風冽龍興而致雲螭蟠俟秋吟蜉蝣

出以陰易曰飛龍在天利見大人詩曰思皇多士生此  
王國故世平主聖俊人將自至若堯舜禹湯文武之君  
獲稷契皋陶伊尹呂望之臣明明在朝穆穆布列聚精  
會神相得益章雖伯牙操籛鍾逢門子鸞烏號猶未足  
以喻其意也故聖主必待賢臣而弘功業俊士亦俟明  
主以顯其德上下俱欲驩然交欣千載一會論說無疑  
翼乎如鴻毛遇順風沛乎若巨魚縱大壑其得意如此  
則胡禁不止曷令不行化溢四表橫被無窮遐夷貢獻

萬祥必臻是以聖主不偏窺望而視已明不憚傾耳而聽已聰恩從祥風翔德與和氣游太平之責塞優游之望得遵游自然之勢恬淡無為之場休徵自至壽考無疆雍容垂拱永永萬年何必偃仰詘信若彭祖啍噓呼吸如喬松眇然絕俗離世哉詩云濟濟多士文王以寧蓋信乎其以寧也

廣成頌

馬融

臣聞孔子曰奢則不孫儉則固奢儉之中以禮為界是



以蟋蟀山樞之人并刺國君諷以太康馳驅之節夫樂而不荒憂而不困先王所以和平府藏頤養精神致之無彊故戩擊鳴球載于虞謨吉日車攻序於周詩聖主賢君以增盛美豈徒為奢淫而已哉伏見元年以來遭值厄運陛下戒懼災異躬自菲薄荒棄禁苑廢弛樂懸勤憂潛思十有餘年以過禮數重以皇太后體唐堯親九族篤睦之德陛下履有虞烝烝之孝外舍諸家每有憂疾聖恩普勞遣使交錯稀有曠絕時時寧息又無以

自娛樂殆非所以逢迎太和裨助萬福也臣愚以為雖上頗有蝗蟲今年五月以來雨露時澍祥應將至方涉冬節農事閒隙宜幸廣成覽原隰觀宿麥勸收藏因講武校獵使寮庶百姓復覩羽旄之美聞鐘鼓之音歡嬉喜樂鼓舞疆畔以迎和氣招致休慶小臣螻蛄不勝區區職在書籍謹依舊文重述蒐狩之義作頌一篇並封上淺陋鄙薄臣不足觀省

臣聞昔命師于韃橐偃伯于靈臺或人嘉而稱焉彼固

未識夫雷霆之為天常金革之作昏明也自黃炎之前  
傳道罔記三五以來越可畧聞且區區之鄴郊猶廓七  
十里之囿盛春秋之苗詩詠囿草樂奏騶虞是以大漢  
之初基也宅茲天邑總風雨之會交陰陽之和揆厥靈  
囿營于南郊徒觀其坳場區宇恢昭曠蕩蘋蕒勿囿寥  
豁鬱泱騁望千里天與地莽於是周陟環瀆右轡三塗  
左概嵩嶽面據衡陰箕背王屋浸以波漾黃以滎洛金  
山石林殷起乎其中峨峨磴磴鏘鏘堆堆隆穹槃迴岬

崦錯崔神泉側出丹水湟池怪石浮磬燿焜于其陂其  
土毛則摧牧薦草芳茹甘荼苾苾芸藟昌本深蒲芝茹  
董苴蕞荷芋渠桂荏鳧葵格韭菹于其植物則玄林包  
竹藩陵蔽京珍林嘉樹建木叢生椿梧栝栢柳楓楊  
豐彤對蔚岑頡摻真翕習春風含津吐榮鋪于布籩薩  
麾薤熒惡可殫形至于陽月陰匿害作百草畢落林衡  
戒田焚萊柞木然後舉天網頓八紘摯歛九藪之動物  
纒索四野之飛征鳩之乎茲囿之中山敦雲移羣鳴膠

膠鄙駭譟謹子野聽聳離朱目眩隸首策亂陳子籌昏  
於時營圍恢廓充斥川谷罕置羅罽彌綸阡澤舉牢陵  
山校隊案部前後有屯甲乙相伍戊己為堅乘輿乃以  
吉月之陽朔登于疏鑿之金路六驕駛之玄龍建雄虹  
之旌夏揭鳴鳶之脩檣曳長庚之飛鬣載日月之大常  
棲招搖與玄戈注枉矢於天狼羽毛紛其影勍揚金燄  
而拖玉環屯田車於平原播同徒於高岡旃旒參其如  
林錯五色以摛光清氛埃掃野場誓六師搜雋良司徒

勒卒司馬平行車攻馬同教達戒通伐咎鼓撞華鐘獵  
徒縱赴榛叢徽嫺霍張別驚分奔騷擾聿皇往來交舛  
紛紛回回南北東西風行雲轉旬礪隱旬黃塵勃滂閭  
若霧昏日月為之籠光列宿為之翳昧標校課才勁勇  
程氣狗馬角逐鷹鷂競驚驍騎旁佐輕車橫厲相與陸  
梁聿皇于中原緇猥蹏蹤特肩脰完羝撝介鮮散毛族  
梏羽羣然後飛鋌電激流矢雨墜各指所質不期俱殪  
竄伏扔輪發作梧轡殺及狂擊頭陷顱碎獸不得豫禽

不得瞥或夷由未殊顛損頓躑躑蟬蟬充衢塞隧葩  
華并布不可勝計若夫驚獸穀蟲倨牙黔口大句哨後  
緼巡歐紆負隅依阻莫敢嬰禦乃使鄭叔晉婦之徒睽  
孤剗刺裸裎袒裼冒櫛柘搓棘枳窮浚谷底幽嶰暴斥  
虎搏狂兇獄齧熊挾封豕或輕訛趨悍瘦疏篲領犯厯  
嵩巒陵喬松履脩樛蹕遶枝杪標端尾蒼蜺倚玄猿木  
產盡寓屬單罕罔合部冒弋同曲類行並驅星布麗屬  
曹伍相保各有分局增落飛流纖羅絡縠遊堆羣驚晨

鳬輦作暈然雲起雲爾電落爾乃顏觀高蹈改乘回轅  
汭恢方撫馮夷策句芒超荒忽出重陽厲雲漢橫天潢  
導鬼區徑神場詒靈保召方相驅厲疫走蜮祥捐罔兩  
拂游光枷天狗緹墳羊然後緩節舒容裴回安步降集  
波蘄川衡澤虞矢魚陳畧茲飛宿沙田開古蠱暈終葵  
楊闕斧刊重水撥蟄戶測潛鱗踵介旅逆獵湍瀨渰薄  
汾撓淪滅潭淵左挈夔龍右提蛟鼉春獻王鮪夏薦鼈  
鼃於是流覽徧照殫變極態上下究竟山谷蕭條原野



嶠嶸上無飛鳥下無走獸虞人植旂獵者效具車弊田  
罷旋入禁園棲遲乎昭明之觀休息乎高光之榭以臨  
乎宏池鎮以瑤臺純以金隄樹以蒲柳被以綠莎廣濶  
沆漭錯紵槃委天地虹洞固無端涯大明生東月朔西  
陂乃命壺涿驅水蠱逐罔螭滅短狐簪鯨鯢然後方餘  
皇連舳舟張雲帆施蜺幃靡颶風陵迅流發櫂歌縱水  
謳淫魚出著蔡浮湘靈下漢女游水禽鴻鵠鴛鴦鷗鷺  
鷓鴣鷓鴣鷺鷥鴈鷺鷥乃安斯寢戢翮其涯魴鰕鰻鰕鰻

鯉鱠樂我純德騰踊相隨雖靈沼之白鳥孟津之躍  
魚方斯茂矣然猶詠歌於伶蕭載陳於方策豈不哀哉  
於是宗廟既享庖厨既充車徒既簡器械既攻然後擺  
牲班禽淤賜犒功羣師疊五伯拔千重山巽常滿房俎  
無空酒正案隊膳夫巡行清醪車湊燔炙騎將鼓駭舉  
爵鐘鳴既觴若乃陽阿衰裴之晉制闌鼉華羽之南音  
所以動蕩胸臆發明耳目疏越蘊惱駭恫底伏鎗鎗  
鎗奏于農郊大路之衢與百姓樂之是以明德耀乎中

夏威靈暢乎四荒東鄰浮巨海而入享西旅越葱嶺而  
來王南徼因九譯而致貢朔狄屬象胥而來同蓋安不  
忘危治不忘亂道在乎茲斯固帝王之所以曜神武而  
折遐衝者也方今大漢收功於道德之林致平於仁義  
之淵忽蒐狩之禮闕槃虞之佃闇昧不覩日月之光聲  
昏不聞雷霆之震于今十二年為日久矣亦方將刊禁  
臺之秘藏發天府之宮常由質要之故業率典刑之舊  
章采清原嘉岐陽登俊傑命賢良舉淹滯拔幽荒察淫

侈之華譽顧介特之寔功聘畎畝之羣雅宗重淵之潛  
龍乃儲精山藪歷思河澤目矚鼎俎耳聽康衢營傳說  
於胥靡求伊尹於庖厨索膠鬲于魚鹽聽窳戚於大車  
俾之昌言而弘議軼越三家馳騁五帝悉覽休祥總括  
羣瑞遂棲鳳凰于高梧宿麒麟于西園納焦僥之珍羽  
受王母之白環永逍遙乎宇內與二儀乎無彊貳造化  
於后土參神施于昊乾超特達而無儔煥巍巍而無原  
豐千億之子孫歷萬載而永延禮樂既闋北轅反旆至

自新城背伊闕反洛京

釋奠頌

晉潘尼

元康元年冬十二月上以皇太子富于春秋而人道之  
始莫先於孝悌初命講孝經于崇正殿寔應天縱生知  
之量微言奧義發自聖問業終而體達至三年春閏月  
將有事於上庠釋奠于先師禮也越二十四日丙申侍  
祠者既齊輿駕次于太學太傅在前少傅在後恂恂乎  
弘保訓之道宮臣畢從三率備衛濟濟乎肅翼贊之敬

乃掃壇為殿懸幕為宮夫子位于西序顏回侍于北牖  
宗伯掌禮司儀辨位二學儒官搢紳先生之徒垂纓佩  
玉規行矩步者皆端委而陪于堂下以待執事之命設  
樽篚于兩楹之間陳罍洗于阼階之左几筵既布鐘懸  
既列我后乃躬拜俯之勤資在三之義謙光之美彌劬  
闕里之教克崇穆穆焉邕邕焉真先王之徽典不刊之  
美業允不可替已於牲饋之事既終享獻之禮已畢釋  
玄衣御春服弛齋禁反故式天子乃命內外羣司百辟

卿士蕃王三事至於學徒國子咸來觀禮我后皆延而  
與之燕金石簫管之音八佾六代之舞鏗鏘闐闐般辟  
俛仰可以徵神滌欲移風易俗者罔不畢奏抑淫哇屏  
鄭衛遠佞邪釋巧辯是日也人無愚智路無遠邇離鄉  
越國扶老攜幼不期而俱萃皆延頸以視傾耳以聽希  
道慕業洗心革志想洙泗之風歌來蘓之惠然後知居  
室之善著應乎千里之外不言之化洋溢乎九有之內  
於熙乎若典固皇代之壯觀萬載之一會也尼昔泰禮

官嘗聞俎豆今廁末列親覩盛矣藏漬徽猷沐浴芳潤  
不知手舞口詠竊作頌一篇義近辭陋不足測盛德之  
形容光聖明之遐度其辭曰

三元迭運五德代微黃精既亢素靈乃暉有皇承天造  
我晉畿祚以大寶登以龍飛宣基誕命景熙遐緒三分  
自文受終惟武席捲要蠻蕩定荒阻道濟羣生化流  
率土後帝承哉丕隆曾構奄有萬方光宅宇宙篤生上  
嗣繼期挺秀聖敬日躋濬哲閎茂留精儒術敦閱古訓



遵道讓齒降心下問鋪以金聲光以玉潤如日之升如  
乾之運乃延台保乃命學臣聖容穆穆侍講閣抽演  
微言啓發道真探幽窮賾溫故知新講業既終精義既  
現崇聖重師卜日告奠陳其三牢引其四縣既戒既式  
乃盟乃薦恂恂孔聖百王攸希臺臺顏生好學無違曰  
皇儲后體神合機兆吉先見知來洞微濟濟二宮藹藹  
庶寮俊乂鱗萃髦士盈朝如彼和肆莫匪瓊瑤如彼儀  
鳳樂我雲韶瓊瑤誰剖四門洞開雲韶奚樂神人允諧

蟬冕耀庭細佩振諧德以謙光仁以恩懷我酒惟清我  
肴惟馨舞以六代歌以九成莘莘胄子初初學生洗心  
自百觀國之榮學猶蒔苗化若偃草博我以文弘我以  
道萬邦蟬蛻矧乃俊造鑽蚌瑩珠剖石搗藻絲篚玄黃  
水罔方圓引之斯流染之斯鮮若金受範若埴在甄上  
好如雲下效如川昔在周興王化之始曰文曰武時惟  
世子今我皇儲齊聖通理緝熙重光於穆不已於穆伊  
何思文哲后媚茲一人寔副元首孝洽家邦光照九有

純嘏自晉永世昌阜微微下臣過充近侍猥躡風雲鸞  
龍是廁身澡芳流目玩盛事竭誠作頌祇詠聖志

河清頌 宋鮑照

臣聞善談天者必徵象於人工言古者先考績於今鴻  
羲以降遐哉邈乎鏤山嶽雕篆素昭德垂勲可謂多矣  
而史編唐堯之功載格于上下樂登文王之操稱於昭  
於天素狐玄玉聿彰符命朴牛文螭爰定祥歷魚鳥動  
色禾雉興讓皆物不盈皆而美溢金石頌聲為之而寢

詩人於是不作庸非惑與自我皇宋之承天命也仰應  
龍木之精俯協龜水之靈君圖帝寶燦爛瑰英固已業  
光曩代事華前德矣聖上天飛踐極迄茲二十有四載  
道化周流玄澤汪濊地平天成含生阜熙文同軌通表  
裏褫福曜德中區黎庶知讓觀英遐外夷貊懷惠秩禮  
恤勤散露臺之金賑民舒國傾御邸之粟約違迫脅奢  
去甚泰讌無留飲畋不槃樂物色異人優游鯁直顯靡  
失心幽無怨魄精炤日月事洞天情故不勞仗斧之使

號令不肅而自嚴無辱鳳舉之事靈怪不召而自彰萬  
里神行颺塵不起農商野廬邊城偃析冀馬南金填委  
內府馴象棲爵充羅外苑阿紈纂組之饒衣履宗國魚  
鹽杞梓之利傍瞻荒遐士民殷富繁軼五陵宮宇宏麗  
崇冠三川閭閻有盈歌吹無絕朱輪疊轍華冕重肩豈  
徒世無窮人民獲休息朝呼韓罷酤鐵而已哉是以嘉  
祥累仍福應尤盛青丘之狐丹穴之鳥栖阿閣遊禁園  
金芝九莖木禾六秀銅池發膏畝腴宜以謁薦郊廟和協

律呂烟霏霧集不可勝紀然而聖上猶夙興昧旦若有望而未至宏規遠圖如有追而莫及神明之貺推而弗居也是以琬碑鏐檢盛典蕪而不治朝神省方大化抑而未許崇文協律之士蘊儻頌於外坐朝陪宴之臣懷揄揚于內三靈佇睠九壤注心既有日矣歲官乾維月纏蒼陸長河巨濟異源同清澄波萬壑潔瀾千里斯誠曠世偉觀昭啓皇明者也語曰影從表瑞從德此其效焉宣尼稱鳳鳥不至河不出圖傳曰俟河之清人壽幾何

皆傷不可見者也然則古人所未見者今殫見之矣孟軻曰千載一聖猶旦暮也豈不信哉夫四皇六帝樹聲長世大寶也澤浸羣生國富刑清鴻德也制禮裁樂惇風遷俗文教也誅筆羯黠東顧象闕武功也鳴禽躍魚滌穢河渠至祥也大寶鴻德文教武功其崇如此幽明同贊民祇與能厥應如彼唯天為大堯實則之皇哉唐哉疇與為侶抑又聞之勢之所覃者淺則美之所傳者近道之所感者深則慶之所流者遠是以豐功建命潤

色騰策盛德形容藻被歌頌察之上代則奚斯吉甫之  
徒鳴玉鸞于前視之中古則相如王褒之屬馳金羈于  
後絕景揚光清埃繼路故班固稱漢成之世奏御者千  
有餘篇文章之盛與三代同風由是言之斯乃臣子舊  
職國家通議不可輟也臣雖不敏敢不勉乎乃作頌曰  
窺刊崩石据逸殘竹巢風寂寥羲埃綿邈鉅生大年瞻  
學淵聞輦繡成景粉績顓軒徒翫井科未覩天河亘古  
通今明鮮晦多千齡一見書史登歌旋我皇駕揆景方



塗凌周躡殷蹶唐轢虞如彼七緯累壁重珠高祖撥亂  
首物定靈更開天地再鑄羣生帝御三傑龍步八垓朔  
南暨教海北騰聲淪深格高挾遐洞冥讒鼎遷宋玄圭  
告成大明方嶽鴻光中微聖命誰堪皇厯攸歸謀從筮  
協神與民推黃旗西映紫蓋東輝納瑞螭玉升政衡機  
金輪豹飾珠冕龍衣正位北辰垂拱南面天下何思日  
用罔倦復禮歸仁觀恒通變一物有違戚言毀膳菲躬  
簡法厚下安宅謙德彌光損道滋益孝崇饗祀勤隆耕

籍鱣耐秋羊封瑾春路嬰老兼梁鰓孤重帛體由學染  
俗以教遷禮導刑清樂宅風宣分衢讓齒折訟推田野  
旌伏彥朝賞登賢儒訓優柔武節熒熱文憲精弘戎容  
犀利樞鈐明審程黻周備吏礪平端民羞幸覲桴鼓凝  
埃烽驛垂轡銷我長兵歸為農畝閩外水鄉郵表炎國  
隴首西南渤尾東北絕艷嶺丹渾渾泉黑移琛雲勉轉  
隼印翹狼歌薦功烏譚陳德治博化光民阜財盛斑白  
行謠青綺高詠雲表幽和物章明慶麗植雕質蠢行藻

性仁草晨華德宿宵映海無隱颺山有黃落牛羊內首  
閭戶外拓瑞木朋生祥禽華作薰風蕩閨飴露流閭器  
範神妙劑調象藥匪直也斯偉慶芳漆注彼四瀆媚此  
雙川伏靈遙紀閔貺遐年澄波海嶽鏡流葱山泉室疑  
澗水府清涓俛瞰夷都降眡驪淵朱宮潛耀紫閣陰鮮  
昔在興德王風不昌乃溢乃竭或壅或亡潔源濫壑曾  
是未央先民永慨大道悠長云何其瑞實鍾我皇聞諸  
師說天竦聽密介馬如響匪遠惟疾矧是皇心妙夫貞

一左右天經戶牖人術訏謩布簡緣言盈室歲有綿祀  
清豈崇日一人之慶吹萬稟和靈根方固修源重波副  
睿貳哲帝體皇柯景雲蔚嶽秀星駢羅垂光九野騰響  
四遐輔車鼎足槃石虎牙世匹周室基永漢家泰階既  
平洪河既清大人在上區宇文明樵夫議道漁父濯纓  
臣照作頌鋪德樹聲

梁簡文帝南郊頌

臣聞惟天為大聖人敬其德知幾其神聖人契其道故

龍官弱言之后合揆于蒼昊鳥紀垂衣之君昭格于上帝莫不巍巍乎穆穆乎渙汗于綠篇氛氲于丹冊者矣我梁皇帝之御天下也乘燁祗之盛曜即璧日之遐照等乾覆之熏養合坤載之靈長四三六五之意十堯九舜之明名與功偕業將時並自撥亂反正伐罪弔民馮玉几握金鏡君臨萬國于今二十有二載也緯天維理地軸移澆風於末俗反淳正于區中化不言而光顯教不嚴而已肅流樂復雅遠符雲韶之世墜體還章非因

忠信之薄九垓同歸四海無波儲明變照儀天作兩三  
袞咸作叶化台光翹襲王風鹽梅帝載塵清世晏蒼兕  
無用其武功運謚時平鵷鷺咸修其文德桃林散甲華  
山優刃玉門罷候紫塞沉鋒屠羊釣壑之士厭洗耳而  
龍簪簪佩版築藏巖之逸去粦穀而紆珩組異人俊乂既  
間出而在官世鏡河仙亦雍容而廊廟蹇蹇同於多士  
諤諤比乎得人五典三墳既歲蕤于璧水九流八索亦  
續紛于石渠畫一之政萬代表于時和三章之律百姓

沐於仁壽于是龍光之地日浴之鄉紫舌黃支頭飛鼻  
飲自西自南無思不服款闕質子稱臣內向珠樹數禽  
越火枝之地銀甕叩杖踰沉羽之溪出赤野而連翩度  
元妙之泱泱于是嘉祥被衆瑞登金人澤馬丹甌玉雞  
三角九尾四眉六足抽鋪地之九莖發端門之連理參  
差于郊藪布護于宮闕府無虛月史弗能記周稱黃鳥  
之旗夏有玄珪之錫無以踰此嘉祥方茲摠萃道洽世  
昌國殷民阜鄉如舜讓邑比堯封委粟西畝神絲被澤

可謂我化若風民應如草我靜如鏡物動猶煙天子猶  
未明求衣日昃不倦撤膳匪躬詢輿訪道鑒旗徐動棄  
千里而弗乘寶瑟無虞捐百金而不服廣行四等被慈  
雨於枯根大闡三朝驚法雷於羣夢曲成萬物去殺愛  
生幽弊之民與蒼雷而共悅否滯之義同谷風而開抒  
昆蟲得性跂蠡欣生三驅有緩前之禽九門無餒獸之  
藥至德之事如此太平之風如彼乃以恭肅神祇理通  
孝敬江左以來輿壇未闢爰命將作揆日載營三靈叶



響百工咸事宛如神造儼類仙居冲秘隱嶙跨千畝於  
晉日閒曠麗遠吞七里于漢年五達四通廓郊彌野南  
瞻重嶽北眺芒嶺東臨灞漭西望舊豐紆餘委蛇丘陵  
起伏澎湃崑崙山川異態飛梁邃宇洞燭穴懸紫殿僊  
宮霞騫鳥翳霧映倒梁日光疎鈇玉桃卷葉銀樹抽芳  
百果千株三珠八柱朝葉與密露共鮮晚花與薰風俱  
落露禽作聚望比翼之翱翔歸飛時宿聞同心之夜響  
故以熊熊灼灼炫兩明而仰七曜紛紛沐沐承五烟而

帶三靈圓丘閒靜紫壇肅設五精之場千神之位八堦  
弘麗四維博敞宛若干仞狀懸流之仙館煥如五彩同  
瑤山之帝壇石牒神昌之瑞方臻金縷飛光之徵永固  
是雕是琢鄙茅茨之為倫非珠非玉啜甘泉之已奢望  
昔方今獨高千古沿襲異等質文斯中於是歲在單閼  
星次娵訾律中太簇日惟辛卯特有事于南郊甸師清  
野封人攬宮朱幕夕峙帷宮宿設曉漢斜陰挈壺升漏  
天子御玉輅動金根八驥揚衡雙龍翼蓋雲罕徐迴鳴

銑韻響風承豹尾日映鵲冠萬騎天行千乘雷動石壇  
犀衣之士連七萃而雲屯珠旗日羽之兵亘五營而星  
列鬱鬱阡阡震震填填充溢乎國都彌漫于鄧邑者也  
若乃迴輿降蹕薦禮帝儀揖太清秩羣望被大裘服山  
冕恭蒼璧之明祀穆靈壇之禋敬黍稷非馨明德惟馨  
日曜彤精天澄翠色百僚師師九官濟濟千神叶福萬  
億均慶六典斯脩三禮必該焚柴告成罔不欽若翠烟  
升綠同河濱之瑞雲丹燎燭天若帝鄉之美氣雲門麗

舞咸池廣樂已叶九韶之曲復諧六列之奏金匏既動  
望蛺蝶之遊龍玉磬徐鳴觀參差之舞鳳袿韞駕肩士  
女填噓接袂為幃連裾猶堵鼓腹擊轅行歌舞攄然後  
紆玉輦而謝書生登靈臺而望雲物欽則美化跨萬古  
于茲日廣運愉樂表千載于當今方當巡云云之禮啓  
亭亭之業封天荅睠禮地徵靈南山之壽無極七百之  
基長固豈不懋哉豈不盛哉菲薄微臣謬與藩服馳心  
休禮秣馬之願無由徒罄褊辭清風之藻多愧敢敷庸

理獻頌十章其辭曰

元始道一渾德氛氲遙哉邃古曼矣初分磅礴地載清  
朗天文大人覩物生民樹君蛇驅龍準作樂垂衣皇圖  
炤灼帝篆歲蕤廓寥中代合聖與誰於鑠我后命世天  
飛玄默馭辯寂照秉真就雲握歷望日臨民謙光履德  
義禮稱珍車書同軌天下歸仁朝章孔脩盛化弘道酌  
衢敬賓欽賢愛老變正是珍燭車非寶如海之深如日  
之杲肅恭明神迅聽前踵配天道尊迎陽義重玄酒陶

鉅燔柴雲聳跨舞論韶寵堯稱拱赫矣郊宮載惟靜謐  
肅肅禁圍陰陰仙室六戎列野八鸞照日架殿星羅重  
宮霧出蒲萄金橘靈壽木難表禁開暑貞檜陵寒山池  
壯麗階閤彤丹葉垂疊雨花落重巒康哉盛德美矣世  
豐三辰炳耀七政永隆五方來洎四隩茲通懸繩度竿  
駕鹿追風既隆懋化復覩瑞茲金車出野玉露霑墀紫  
槩神草華平瑞芝長愉汪濊永固雍熙照天漏渙遠肅  
邇睦惠靡齊民恩彌比屋式光惇史踰斯郁郁皇哉康

哉同斯景福

簡文帝馬寶頌

皇帝應百姓之心副四海之願復履玉衡還臨億兆天  
地交泰日月貞明至理惟新隆平方始遐邇壹體中外  
禔福含生欣欣若耘耰之逢夏雨懷情坎坎譬草木之  
值春風帝王之道超邁開闢睿聖之功殫歷邃古軒羲  
不足鑒桷堯舜不足憲章至哉大哉無得而稱也五月  
丁酉朔絲竹會于德陽之堂于時日進內宮星次鶉首

仲夏之晷稍極陽城之圭蕤賓之鐘初應潁川之律縉  
雲旦卷南風晚扇惠氣入帷清陰周宇玉輿雲罕照日  
充庭羽林中權分階列校簪笏成行貂纓在席昭天之  
樂金石鏗鏘報地之禮威儀肅省詔以馬寶示羣臣太  
僕効官趣馬掌贊三令五申丞聯事舉八麗四圍給役  
相趨暉煜金鑣陸離寶勒天地無疆之德永星致遠之  
功鸞眄善鳴龍儀美稱沸毅權奇之威趨攄抑揚之態  
足轉驚電眼流含燭霧噴紛霏流沫飄洒數千為壽豈



待原蠶之禁萬里一息不藉杜衡之草王良不能控其  
衡策伯樂不能辨其文機方知總轡崑崙周非吾馭張  
樂大野夏有慙德豈止沉河用壁獨有綠文之稱盛德  
在木偏受蒼龍之名至於干將寶劍遙服晉鄭之軍蓮  
花烏玉騰威大海之際況乎馬寶義實踰之方當夙沙  
自歸滑橋屈膝欵關入塞偃武修文去病無出師之勞  
充國罷議邊之畧五律成珍九河如鏡臣謹按瑞應經  
彌勒成佛經中阿含經覽愚經並稱第三之馬者三千

歲華子云堯漢皆得馬者堯漢皆火德正斗南方乘德而至也豈非聖德汪濊皇風洋溢研機洞玄備禮達義是以天不愛道白馬嘶風王澤効祥朱鬣降祉比夫圓蹄方足躑躅在郊風嘯雷奔聲邀處圉五彩依樹三雀登巢安髣髴于當今弗擬議于休應百辟卿士咸稱萬歲伊臣不佞結慶雲霄親承詔旨預觀寶瑞手舞足蹈贊揚不足宴禮斯畢退而作頌其辭曰

帝廣運德欽明儀郊升道形聲德為軌仁作經璇璣正

泰階平割五禮和六英開四攝行八政轉輪皇飛行聖  
慈含識資惠命引蒼生歸法性菩提真般若淨七寶均  
萬邦寧述惇史觀陳詩域中大唯聖期聞玄妙復孝慈  
解流澤隨因時刑已措績成熙三農盛九穀滋萬祗悅  
八神怡律有節歷得天景星曜慶雲連珠為月醴為泉  
民何幸值皇年乾道應坤馬來度玉闕升玉臺鏤錫煥  
鸞鑣迴槃雲轉堞塵開千天駟百龍媒永伏阜掃駒駖  
秣瑤粟委芳芻九夷歛四表清眊胥樂興頌興

文章辨體彙選卷四百五十六

欽定四庫全書

文章辨體彙選卷四百五十七

明 賀復徵 編

頌二

唐玄宗鵲鵲頌

朕之兄弟惟有五人比為方伯歲一朝見雖載崇藩屏  
而有睽談笑是以輟牧人而各守京職每聽政之後延  
入宮掖申友于之志詠棠棣之詩邕邕如怡怡如展天

倫之愛也秋九月辛酉有鵲鵠千數棲集于麟德之庭  
樹竟旬焉飛鳴行搖得在原之趣昆季相樂縱目而觀  
者久之逼之不懼翔集自若朕以為常鳥無所志懷左  
清道率府長史魏光乘才推白鳳辯壯碧鷄以其宏達  
博識名至軒檻預觀其事以獻其頌夫頌者所以揄揚  
德業褒讚成功顧循虛作誠有負矣美其彬蔚俯同頌  
云

伊我軒宮奇樹青葱藹周廬兮冒霜停雪以茂以悅恣

卷舒兮連枝同榮吐綠含英曜春初兮蓐收御節寒露  
微結氣清虛兮桂宮蘭殿唯所息宴棲雍渠兮行搖飛  
鳴急難有情情有餘兮顧惟德涼夙夜兢惶慙化疎兮  
上之所教下之所效寔在予兮天倫之性魯衛分政親  
賢居兮爰遊爰處爰笑爰語巡庭除兮觀此翔禽以悅  
我心良史書兮

封東嶽朝覲頌

唐蘇頌

封祀之山五在中國泰嶽首之昊穹之命再集巨唐皇

帝受之臨位十四年考虞氏歲巡之義諷周王時邁之  
什十月辛酉步自有洛十一月丙戌帳殿齋于岳趾淵  
默以清繹思而照將紀功布度順斗承天精享也已丑  
宏觀軼區宇盛儀振開闢高臨建鳳萬隊張皇以燭山  
上御飛龍百神翕習以扶道國台二藩后四髦士密侍  
信臣高位扈封臺列升陞不下五十以聖言冲邈瑤牒  
寶書誓之旨曰朕獲守丕業恐不克駿命惟上帝儲休  
錫蒼生無疆之慶朕之慶也古則秘之何哉屬寒馳迅



颺露清終夕若掃若鋤晏然而已庚寅天官次錄王制  
協時嚴高祖以配之祀高宗以陟之冕裘立珪璧序潔  
鼎俎調鐘呂倨勾于簋虞憂擊乎祝故寶駢瑞兮物焜  
煌空薄霄兮音容與則纖塵不動和氣充塞日在于觀  
天為之門揚日大光謂小天下昭以抱戴見之卿霽郁  
郁紛紛喜氣烟煴當芝檢引紫熏太紫洞而三辰接鬱  
蒼搖而萬歲聞自下達上徯吾君君之來兮望如雲端  
兮睟聖之門至尊辛卯有事于社首以泰折如泰壇於

穆我睿宗侑而作主奠獻鳴咽天子之孝也僉以金匱  
歸勛于祖禰石礪藏美于乾坤戒咸秩則司存癸巳載  
大旂合大樂三陟岵以惟抗四亞鏘而輅止朝羣牧揆  
千官底邦賦數庭寔華蟲辨等車馬來覲周人隨人二  
王之賓戎狄蠻貊萬里重譯必拱于著執贄奉璋顯顯  
昂昂靡敢迨遑乃建雞竿伐鼉鼓帝命出皇恩溥揚異  
風作解雨施舍之蕩滌之宥法罪除頗類瀕湯洋溢周  
流黜黜不崇朝而遍者與此山俱疇翳而不拔胡微而

不鋪也亦既稱壽申命宗伯咨爾頌焉效古之刻石臣  
頤稽首再拜而言曰臣聞昔在帝堯臣惟咎繇聰明之  
謂聖邁種之謂德天若曰依于巨唐易姓者李王于中  
華崇功者唐聖之澤德之浸也我唐祚之興昌符誕膺  
兩儀動六葉承皇帝宣高祖四宗之景烈肇開元神武  
之明號廣矣大矣莫有不寧罔有不俾咸一德之輔不  
二心之臣羣后抗詞曰臣聞先王因天事天因地事地  
因名山升中于天陛下得天之經得地之義得人之行

行也者孝莫大焉兼三才以為政政也者仁莫大焉含萬物以為性今三才貞萬物享六典平九功成官不溜獄不放至于刑清良有以也古者振兵釋旅祠土祈穀先事也我是以幸太原祭汾睢耀金甲肅邊鄙蕃馬讐而不敢南向解嚴京師獲寶鼎獻宗廟戍人歸而盡務東作報福京坻于是乎爰佐五時郊天以奉時爰崇九室裕祖而敬思昭格遲遲神人允釐無何籍三脊盛六總不召斯至擁休之類如山川則委曷月而秘始嚴鹵

薄騰七萃啓禁闕迴九重以聽乎鸞聲之雍雍匪疾匪  
徐物有其容動植讚華夷觀駢闐總搏羨漫半散出成  
臯踰榮波馮滑臺眺洪河遂並昆吾之墟倘佯乎大舜  
之澤瀕四瀆二濟入于充徑九一三齊喬于岱推二旬  
有六而頻行在莫不皤皤華皓如藿傾陽或牽以簞或  
捧之觴偃偻乎康莊一以伸神武之今日一以感乾封  
之舊章迺餼歸之觴舉之慈且惠而與之驩沸渭頡頏  
矧國鄒魯家洙泗乘汶野而圖記可知指泮林而頌聲

不墜以周公之故將孔子之後翹然希王者之屬車聖人之清蹕則久及信宿之應巖巖所瞻宗神曰天齊王加一等于三事戶二十供祀環十里禁人樵報也大禋旅之數重褒成之祿撫遺亡賜之復帝曰吁夫艱難繫王業休咎牽人事况天監之殊祥也殊典也不自滿而虔鞏于位朕寶臣曰乾曜洎說有初有終時乃風欽哉汝作朕左右丞相繫汝忠益以嘉猷補袞之闕罔或怠遂弘天封煥天章篆介丘而旋德陽大饗乎羣方程俊

代美其律聲其寔墳作四而籍言七也臣頤不敏繼伯  
夷之直清微太史之留滯聆金奏同百獸之舞振木鐸  
採萬人之詩敢陳詩以頌曰

天子聖兮天孫崇登以封兮報以功受命再惟皇代天  
之賚人所載言士馬山嶭戈矛山沓禎符山雜靈響山  
答天與人合我鋪衍兮長粹清太元冊兮太一精休光  
光我之慶成舜四朝而禹萬國莫之我京

開元正厯握乾符頌

張說

客有嘲臣曰聖主正新厯握乾符百僚賡歌以美時六合鼓舞以頌德先生獨宴默書閣含翰詞林奚其為儻儼也臣應之曰斗水不能評巨壑之量隙光未足議大明之體何者見褊而守隘也握乾符者不謂執天命歟執天命者非夫廣德休厯交相表裏況命者夫子之所罕言也焉可徧贊而總握符之盛哉如作者略大本舉小節不亦仲尼之門所聽瑩也是以涸思乾慮久難其述客無異焉客曰請終餘論粵若我大唐慶始白雲道



昇紫氣屬漢東失馭淮南不返高祖舉晉陽之甲戡定  
關西太宗因僉后之師削平天下高祖收圖海外擒王  
封中九域黎人重代飲澤雖鳴鶩改號神龍中興周陽  
歸唐玄圭祀夏中宗違代嬖孽窺國于是乎聖上起藩  
邸入鈎陳一麾水心羣克泥首崇復大聖越踐少陽受  
禪當宇而光大前烈垂統拜壁而慎寧後嗣四海有覆  
盂之安百代無委裘之隙是之謂聖人握符之大寶也  
四星入輔五將出禦倚禮樂為國計仗仁義為軍勢英

賢集殿而文教成于戚舞階而武功振敬讓光于九族  
孝慈行于萬宇磧嶂西南渤瀚東北織皮火毳暘炎山  
陵熱海向風來王黑貂駿駿浮天溟絕冰漠連歲獻我  
鳥獸無猜人之意草木無不達之氣升中于天比天同  
貴是之以為聖人握符之大政也歷試上黨黃龍飛天  
入清中禁白虹指日瘞汾睢寶鼎見柴岱宗卿雲蔚非  
應事而呈瑞者雖多狎而不紀矣是之謂聖人握符之  
大祥也以數推氣以氣定朔以星殷時以閏成歲考星

躔而革疎度置氣差而辨誤日立大衍之紀象大渾之  
晷合鐘律之聲極鬼神之情是以謂之聖人握符之大  
厯也若夫仁聖根于內菁華發于外祥兆祕于前謠讖  
灼于後自然之理也彼洛下閤者漢太初時一巧厯耳  
其云後八百歲當差一日有聖人正之斯人也抑將露  
才揚術預證來聖有耆舊之傳記無史策之明文然至  
隋之開皇及麟德聖厯三家創法一引為徵約之年代  
則隣近稽之圖錄則曖昧未有如新厯之昭昭者矣昔

在唐虞之際以土精受命者七神得四均間氣而生者又二十八人所謂三十五際者也禹以金德王故夏后之有天下也生數四百年契以水德王故殷人之有天下也成數六百年稷以木德王故周人之有天下也成數八百年伯益之命中天而堯族以火德乘之故漢室之有天下也生數再及二百年其間距王而興不能復大禹九州之跡及勝殘百年之命者皆五神之餘氣也  
舉陶降德皇唐復興土精應王厚德載物生數五百成

數千年命厯有歸此其大較修德增祚與天無窮轉算之徒莫能究也緯以入元三百四歲為德運七百六十歲為代軌千五百二十歲為天地出符四千五百六十歲為七精返初天人相應若合符節自堯典命羲和修重黎之舊理顓頊之厯上元甲子千五百餘歲得孔聖而春秋之厯序暨開元十二年甲子凡三千四十歲遇聖上而大衍之厯興是時也土德入生數之元天命當出符之會信矣伏惟聖上聰明文思道德之具也豁達

大度皇帝之體也藝總六經漢光之學也文通三變魏祖之才也緣情定制五禮之本也洞音興度六樂之宗也神於弧矢黃軒之威也聖于翰林蒼頡之妙也兄弟善友王季之心也子孫衆多周文之福也大寶以定天位大政以布廣德大祥以合靈符大厯以啓成命德位兼才臨照如此符命介福粲彰如彼所謂廣德休厯交相表裏之效也善厯者必推來運以自神興王者不俟往言以表聖誠徵夫洛下閎之語也且不容成之事

乎其如恃有命比如日孰是夏王之福也賴卜年哀其德豈謂周公之訓也故曰王者執天命在于俟天符致天符在于順天德布天德在于保天位四者備矣然後陳其盛德告于神明捨此道也胡可語正天厯握乾符哉諛臣懵學謝生玄造樂虞曲之歌舜羨周詩之美大敢不數信辭薦清樂獻上客之課託衆篇之後云爾

維皇六葉於赫啟聖步玉斗握金鏡地維續天柱正山川授方雷雨施令清廟九祐堯門百慶郊稷尊祖擇昌定

命德自我流藝從我修龜易八卦龍書九疇文含玉律  
字吐銀鈎鳴絲鶴舞調箭猿愁集賢榜殿花萼名樓神  
用外表事行先兆萬目朝徹千心暗曉卿雲爛漫黃龍  
窈窕遊姑射神人宵登泰山天下小飛祥定瑞均靈蹕  
類鞮譯窮天琛維盡地爍此金戟鑄為農器匪直也然  
探玄索祕軸止輪運辰居星轉得一神凝吹萬情辨發  
歛晦朔合明幽闡階堦朝開宮槐夜卷正我長厯同符  
大衍天地清焉日月貞焉四時行焉萬物生焉窮神知



化美功成焉金版玉牒遠頌聲焉

上黨舊宮述聖頌

張說

維開元十有一祀正月皇帝展義于河東挾右太行留  
宴上黨整兵耀武入於太原設都建頌以崇王業南轅  
汾睢祈穀后土天清日朗神歆如荅三月庚午飲至長  
安六軍解嚴四方和會通觀法象遐詠德澤大虞巡之  
典修美漢祠之禮舉人心翕而一變神物效而無方于  
是邠王臣守禮寧王臣憲申王臣撫岐王臣範薛王臣

業獻書于內開府儀同三司臣璟尚書臣駿臣象先臣  
頤御史大夫臣濯抗疏于外僉曰陛下受天厯數稽聖  
典謨道貫三靈仁育萬物掃陰沴闕睿宗大聖真皇帝朕  
畏天將命不敢怠遑其乾符坤珍皆先聖之餘福朕何  
力之有焉然重違昆弟公卿之請抑以敬從無為虛美  
重朕不德也羣臣游聖宇蕩莫能名約乎舊史敢頌成績  
辭曰

帝廣德運乃聖乃神天祚聖兮唐雖舊邦其命維新再

受命兮帝初正人降居上黨天下往兮黃龍晝見攀天  
而上九五象兮帝適于野紫雲之下求必在兮帝寢于  
堂變龍有光觀者駭兮天迹童謠木連著立總神異兮  
空鍾化穴縞鹿赤魚何詭異兮上天無聲託類附形覺  
悟人兮聖皇齋栗在得戒失昭事神兮皤皤潞老樂我  
王道愛舊宮兮赫赫頌功與天比崇攄無窮兮

聖政紀頌

來鶴

穆宗皇帝臨大朝與羣臣言奏政事羣臣退而宰臣奏

曰陛下問及乎政事此三王五帝之所徽美也陛下不問及史臣此三王五帝之所弭已也徽美者將有乎聞也弭已者將有乎亡也以聞之而又亡之則陛下徒有宵衣旰食之名規天條地之績與羣臣言後若颺然拂冠過冕湮時銷日無得用於後譬如十夫樹楊一夫拔之無得以成其大也政事羣臣得陛下日問之是十夫樹楊也史官執筆為陛下日遠之是一夫拔楊也使後之人訝聖朝空晨虛夕閒殿曠廷無君臣咨謀洋溢之

言之社稷安危強諫之說是不亦遠史臣致不載其事如拔去其楊將弭已之謂乎臣伏念貞觀永徽之代百官之有耳目但聽視天子而已故言事者安論紓辭無疑權慮勢史官執筆于階之下天子側旒于殿之上奏者發誠于庭之中是以正衙一開則臣誠前而啓之帝旒近而鎮之史筆隨而絡之由是君臣謀國圖政之事俞機都要之言訖業發神豐編照物偕籍于堯典差光于天陽至今見太宗文德若三王五帝之所徽美也自

永徽之後宰執不正窺伺是忌針棘前後阻越對駭狼  
噬虎食持膏銜肉蓋以言多為己曾不致君內荏失中  
畏使人聽乃奏史官與百僚俱退然後宰臣請事由是  
君有問而宰臣知之史官不得與于聞君有舉而宰臣  
謀之史官不得記其事次第周行檢錄制誥與冗吏同  
工而已臣嘗涕泣已歎豈有以一己之細一性之忌于  
泰畧圭景之間苟嗜急須迴天遮上使聖緒神績有嘉  
敬善諷罔得聞于千萬年枉有謂明朝空晨虛夕閒殿

曠廷無君臣咨謀洋溢之言乏社稷安危強讜之說若  
今踵而承之則不唯臣有障聰蔽睿之刺抑陛下雖有  
三王五帝之所徽羨而若遠史臣則三王五帝之所弭  
已也抑又有一夫拔楊之謂歟臣請史官執筆當羣臣  
執事隨日撰錄號為聖政紀臣歷朝荷錄幸甚穆宗皇  
帝動宸頷旒憮然歎曰吁朕罔敢粉名厥後乃罔知厥  
後然聖人存簡策者亦非以粉名也蓋存乎大國之典  
鴻祖之業我國有典我祖有業業在于典典在于史曷

厥史不書是尸余于祖涸業于典也朕續承聖緒恭惟  
恪思將念厥政未嘗不離安廢酣馳荒驚遠是以每與  
宰臣言如簇天下一巡省每見宰臣退而展天下盡聞  
知豈圖臣蓄猾謀公無同事欲弄尾舌先衛巖穴隔斥  
史臣占佞明后致懿搜嘉訪不存堯典之書善諷名猷  
莫出清廟之什史臣負我不舉其官宰輔盡忠厥聞有  
此由是詔史職執史筆立于廷之下錄君臣臚句之必  
行載剛毅進退之敢議題其篇目曰聖政紀也至上之



即位三年有鄉校小臣來鵠居山澤間常私心重惜史臣以其史臣者是當國之鏡千億代之眉目也因窺穆宗寔錄得解憤釋嫉于立史官為聖政紀者追而頌出其事以鑒今之廷列故拜獻其頌曰

三王不書五帝不紀有聖有神風銷日已何教何師生來死止無典無法頑肩慕比三皇寔作五帝寔治成天造地不昏不圯言得非排文得聖齒表表如見者莫若乎史是知純朴休結正簡斯若君誥臣箴觚編毫絡前

書後經規善鑒惡國之大章如何寢略嗚呼貞觀多叶  
永徽多俞廷日發論殿日發謨牙孽不作烏鼠其餘論  
出不蓋謀行不紆楹然史臣蛇然史裾瞠瞠而視逶逶  
而婁翹筆當面決防納汙不枯爾智不席我愚執言直  
注史文直敷故得粲粲朝典落落廷謨聖牘既多堯風  
不淺頌編坦軸君出臣顯若儼見旒若俯見冕無閒殿  
曠廷無尸安素晏三王不亡五帝不翦太宗得之史馬  
斯展暨乎後相圖身天子專問我獨以言史不得近丘

明見嫌倚相在擯秉筆如今隨班不進班退史歸惘然  
疇依奏問莫覩嘉謀固稀取彼誥命祿為國肥炯哉時  
皇言必及章德室五帝道與三王如何翊臣嚙肉嗜盍  
甯距磨快福衡物長控截僚位占護揚光垣私藩已遠  
近庾唐俾德音嘉訪默縮暗亡咽典噤法蓋聖籠昌曷  
以至此史文不張後必非笑將來否臧謂乎殿空宸逸  
朝懣廷荒不知姦蔽文失汪洋有貞觀業有永徽綱亦  
匿匪見亦寢匪彰賴有後臣知言不佞伊尹直心太甲

須聖事既可書史何不命乃具前欺大陳不敬曰逐史之喻請以物並且十夫樹楊一夫欲競栽既未牢擗豈能盛帝業以栽逐史似擗穆宗憮然若疚若營何昔臣斯隱我袒正不傳親問不寫密諍孰示來朝以光神政由是天呼震爰徵奔召急史提筆來叱廷而入端耳抗目不撓不挹獬豸側頭螭蚪擺溼握管絕怡當殿而立君也盡問臣也倒誠磊磊其事鏗鏘其聲大何不顯細何不明語未絕緒史已錄成錄成謂何書政紀名伊紀

清芬可昭典墳古師官鳥昔聖官雲方之我后錄里書  
分錄有君法書有君文君法君文在聖政紀云殿無暇  
時廷無曠日雲諏波訪倦編刊筆君劬臣勞上討下迷  
惟勤惟明在聖政紀出至德何比至教焉如孰窺孰測  
外夷內儲謂君有道乎臣有謨歟有道有謨在聖政紀  
書一體列秩同力翼戴祈福去枚絕防無礙國章可披  
唐文可愛善咨不偷嘉論不蓋不偷不蓋在聖政紀載  
諒夫總斯不朽可懸魏闕愚得是言非訕非伐寔謂鑒

臣渾沌開君日月妖物零死天文光發惟我之有頌兮  
奚斯躍而董狐麗

大唐中興頌

元結

天寶十四載安祿山陷洛陽明年陷長安天子幸蜀太  
子即位于靈武明年皇帝移軍鳳翔其年復兩京上皇  
還京師於戲前代帝王有盛德大業者必見于歌頌若  
令歌頌大業刻之金石非老子文學其誰宜為頌曰  
噫嘻前朝孽臣奸驕為昏為妖邊將騁兵毒亂國經羣

生失寧大駕南巡百僚竄身奉賊稱臣天將昌唐繫晚  
我皇匹馬北方獨立一呼千麾萬旂戎卒前驅我師其  
東儲皇撫戎蕩攘羣兇復服指期會不踰時有國無之  
事有至難宗廟再安二聖重歡地闢天開蠲除妖災瑞  
慶大來兇徒逆儔涵濡天休死生堪羞功勞位尊忠烈  
名存澤流子孫盛德之興山高日昇萬福是膺能令大  
君聲容沄沄不在斯文湘江東西中直浯溪石崖天齊  
可磨可鐫刊此頌焉何千萬年

無疆頌 李華

臣華言伏以漢明帝時徼外蠻夷槃木白狼獻詩歌德  
屬事史官況臣自曾祖至臣脩國家職員臣又逮事玄  
宗肅宗今以餘年獲事陛下官厯御史補闕尚書郎命  
薄多病不獲奔赴闕廷恐先朝露同于泥塵若無歌詩  
頌德曾蠻夷不若也敢述列聖為無疆頌式昭皇家大  
慶無窮謹昧死稽首以聞

高祖元頌



昊昊旻天監于下興有德維隋之杪時黷陰凝陽潛未  
登人思照矣雷行龍興盪濯零慝文明乎萬國垂仁蒸  
人載親天監保我子孫巍巍皇皇後之皇丕承之

太宗烈頌

高祖受天命誕興太宗成天之命帝煬昏逾黎人毒痛  
甚熱于爐甚溺于途以號以呼呼天無辜高祖謂太宗  
爾必有天下爾其討謨太宗稽首恭授天命臣請滌除  
張我師撫征四國翦薙羣慝鼓一方三方震驚默昭其

靈隨顧而平我負我乳我安我成以奉君父以臨天下  
任忠孝文武建禮章樂舞我雖明德諫則納汝時惟帝  
降佑之自古明后莫如我德我勛唐無疆天子之無疆  
本太宗休命

高宗康頌

肇為址為堂寔勒寔勛付俾厥裔丕承后帝思不忘神  
棐靖康不耀而光不求而昌自中方外達夷羌瞻我大  
邦助祭在于廟執貢朝于王油油時雲雨厥百穀濇濇

景風扇彼嘉穀飴口飽腹以厭以足俾壽而福都阜成天人

中宗興頌

屏蠱之毒疊而為蝮謀虐天之族天祐聖祚八柱將覆  
帝告五臣保翼朕躬赫赫彤彤日升雲中百臣受命鉞  
爾頑兇故曰再造我天下生人鼓舞既成矣又奉父母

睿宗德頌

后戚之禍再興有危兢兢廟祧震怒陰命聖子翼登聖  
父奮其神旅宵杖金斧殄殲逆亂大聖照臨元元宅心

歸祚于有功有德於戲盛德

玄宗文頌

御製泰山頌罄天張宇盡地  
開封武稱有截文表時雍

丕鑠玄宗之明克孝克仁允武允文宣祖宗之光垂于

子孫盛禮畢舉大樂畢陳百蠻來賓元元阜殷戎或不賓  
遣師徂征罔不頓顙蹈于雷霆在漢方昌用刑慘酷中都  
繫考六萬餘人使者案錄誅千萬人其後賢王光武赫赫  
誅沛賓客以千以百孝明稱賢楚獄連年坐死待捕以萬  
以千猶曰漢祚宜長越我祖宗不忍用刑至于玄宗哀彼

鉄鎖降為鞭扶誕告郡國大為屋室醫彼百疾追懷登遐  
止害禽畜旁為陂池養鱗介族既濡既渥昆蟲草木享國  
五十年寓縣晏然逆臣犯天天念蒸人若曰寧我負恥不  
忍人戰死乃告元子理兵朔鄙西幸蜀都命元子受圖天  
下既定父堯子舜歸于國都無不欣愉無不涕濡傳聖自  
願升靈太微嗚呼上聖之道之純不可度思

肅宗孝頌

穆穆孝慈有如肅宗之誠達于神祇爰訓六師震登北

陞陵陵雷馳西戎南蠻北狄東夷咸舉其旂佐皇之威  
帝心如天無嗜無慾皞然丘岳破裂崖谷逆隸傾覆朝  
社大復屈于海之外服以盥以舞以躍帝在東宮  
孝如文王蒸蒸其心天地知其孝既收鎬洛祀于陵廟  
奉迎上聖天日並照有兇有孽將噬將嚙我旂方設則  
已顛蹶如燁于雪尊嚴而仁仁覆而嚴大臣小臣莫不  
潔廉躬勤百度百度如其素

今上照頌

大邦之興維天相之曷興曷相有德繼王昔殷王盤庚  
武丁紹登殷明矧我帝君丕承天命疊引其慶生我皇  
聖幼冲聖敬寔左右肅宗開國御戎羣師稟教舉則成  
功自西自東如霆如風蕩滌元兇罔不率從既登大位  
於變時雍人咸曰上如太宗延億兆斯年地博天崇罔  
不爾容玄宗元孫為玄宗烈文肅宗元子承肅宗孝理

鳳翔出師紀聖功頌

楊炎

維唐七葉姁臣大盜于二京皇帝龍鳴于河北觀兵雍

上建都發號以朝萬國心嚮天地志通幽昧淳精四達  
大造玄成於是巢山駕海之羣狼蠹鳥章之君不期而  
超于闕下者四十有三萬元帥廣平王俶太尉光弼司  
徒子儀等稽首言曰臣聞天啓聖以俟時聖感時以赴  
難意者河洛徯然後東征之期人靈駿奔望西狩之禮  
天子方齋寶輅講金匱之書翼日霓旌武賁大車之輪  
黃鉞靈鼉彤弓太阿荆韓楚魏之廣七閩五獠之長金  
鼓百萬車徒九合大陣于東郊皇帝建白麾以誓于軍



曰維高祖歆于上天四宗重光照臨下土百有五十祀  
至于聖皇總武之干戈脩文之法象蕞爾逆豎敢迷天  
紀盜我符璽黷我威靈使四海之內兵革縱橫肝腦塗  
裂旻蒼降鑒錫命于予俾續夏已墜之功寬克未刑之  
族於戲予匪玉帛山河是愛惟蒼生災害是憂匪天命  
威力是憑惟人心忠信是保咨爾張目成天羅植髮成  
干櫓布和成將帥厲氣成風雲若作進退爾惟旗鼓若  
斷首尾爾惟常蛇若戮鯨鯢爾惟干將若拯沉溺爾惟

巨艦夏有一旅之衆武有十人之暮志定金石信非盟  
誓爾其念哉是時天威動六合兵氣連太白乾坤為之  
坼軋河嶽為之震盪彼狐鳴鑿齒之徒不崇朝而聲反  
于謳歌形歸于蹈舞者歲過半矣故鄴杜之師以形勝  
灞上之兇以威逐桃林之陣以奇破河洛之孽以氣摧  
帝乃開天牢迴豹尾陵顯氣鎖攬搶應龍秉鉞玄女侍  
坐乃考夏氏配天之儀脩漢皇建武之典雲髦玉輅山  
動地踊降自西雍幸于京師萬姓前導百靈為衛布德

澤望陵寢悲黍稷之將離覽城闕之為墟以雷雨洗川  
澤以皇風清怨怒以大賞議勤勞以成功告宗廟以詳  
明去聾昧以惠政哀困窮清蹕而奉聖皇稱觴以朝前  
殿于是東國耆老長安士庶排御輅入天庭動千門呼  
萬歲烟雲下遶林藪山迴神靈頌于堂精魄感于廟王  
侯慶于國父子洽于家鍾石反于懸壘組陳于席俾不  
思而降不祭而歆以元和感生淳古于是宰臣聚而言  
曰主上以神武清難至德遂人崇勛絕瑞光照萬古闕

開日月于今六年百姓豈忘力于帝乎人臣盍謝生於  
天子請相與鑿石于誓師之場告成于得衆之地斯王  
道之盛典臣炎稽首敢獻頌曰

天命帝兮蕩妖氛交風雨兮會秦門惟聖德兮漫海外  
五單于兮勇士衛瞻鳥獸兮家雲島越浮山兮泛青草徵  
羽騎兮列天營啓金滕兮賜長纓日為車兮雷為鼓醢  
鯨鯢兮掃烟雨開明堂兮饗文祖帝為皇兮后為母歌  
雲臺兮冊王府篆穹石兮駕終古

元和聖德頌

韓愈

臣愈頓首再拜言臣伏見皇帝陛下即位已來誅流姦  
臣朝廷清明無有欺蔽外斬楊惠琳劉闢以收夏蜀東  
定青徐積年之叛海內怖駭不敢違越郊天告廟神靈  
歡喜風雨晦明無不從順太平之期適當今日臣蒙被  
恩澤日與羣臣序立紫宸殿陛下親望穆穆之光而其  
職業又在以經籍教導國子誠宜率先作歌詩以稱道  
盛德不可以辭語淺薄不足以自效為解輒依古作四

言元和聖德詩一篇凡千有二十四字指事寔錄具載  
明天子文武神聖以警動百姓耳目傳示無極其詩曰  
皇帝即祚物無違拒曰暘而暘曰雨而雨維是元年有  
盜在夏欲覆其州以踵近武皇帝曰嘻豈不在我負鄙  
為艱縱則不可出師征之其衆十旅軍其城下告以福  
禍腹敗枝披不敢保聚擲首陴外降幡夜豎疆外之險  
莫過蜀土韋舉去鎮劉闢守後血人于牙不肯吐口開  
庫啗士曰隨所取汝張汝弓汝鼓汝鼓汝為表書求我

帥汝事始上聞在列咸怒皇帝曰然嗟遠士女苟附而  
安則且付與讀命于庭出節少府朝發京師夕至其部  
關喜謂黨汝振而伍蜀可全有此不當受萬牛鬻炙萬  
甕行酒以錦纏股以紅帕首有惟其兇有餌其誘其出  
穰穰隊以萬數遂劫東川遂據城阻皇帝曰嗟其又可  
許爰命崇文分卒禁禦有安其驅無暴我野日行三十  
徐壁其右關黨聚謀鹿頭是守崇文奉詔進退規矩戰  
不貪殺擒不濫數四方節度整兵頓馬上章請討俟命

起坐皇帝曰嘻無汝煩苦荆并洎梁在國門戶出師三千各選爾醜四軍齊作殷其如阜或拔其角或脫其距長驅洋洋無有齟齬八月壬午闢棄城走載妻與妾包裹稚乳是日崇文入處其宇分散逐捕搜原剔藪闢窮見窘無地自處俯視大江不見洲渚遂自顛倒若杵投臼取之江中枷脰械手婦女纍纍啼哭拜叩來獻闕下以告廟社周示城市咸使觀覩解脫繫索夾以砧斧婉婉弱子赤立偃僂牽頭曳足先斷腰脅次及其徒體骸



撐拄末乃取闢駭汗如寫揮刀紛紜爭刳膾脯優賞將  
吏扶珪綴組帛堆其家粟塞其庾哀憐陣歿廩給孤寡  
贈官封墓周帑宏溥經戰伐地寬免租薄施令酬功急  
疾如火天地中間莫不順序幽恒青魏東盡海浦南至  
徐蔡區外雜國怛威赧德踧踖舞掉棄兵革私習簋  
簠來請來覲十百其耦皇帝曰吁伯父叔舅各安爾位  
訓厥眚晦正月元日初見宗祖躬執百禮登降拜俯薦  
于新宮視瞻梁栢感見容色淚落入俎侍祠之臣助我

惻楚乃以上辛于郊用牡除于國南鱗荀毛虞廬幕周  
施開揭磊砢獸盾騰竿圓壇帖安天兵四羅旂常婀娜  
駕龍十二魚魚雅雅宵昇于丘奠璧獻竿衆樂驚作轟  
飀融冶紫焰噓呵高靈下墮羣星從坐錯落侈哆日君  
月妃煥赫嫗嫗瀆鬼濛鴻嶽祗業峩飫沃羶薌產祥降  
嘏鳳凰應奏舒翼自拊赤麟黃龍逶陀結糾卿士庶人  
黃童白叟踊躍歡呀失喜噓歐乾清坤寧境落褰舉帝  
車迴來日正當午辛丹鳳門大赦天下滌濯剗磓磨滅

瑕垢續功臣嗣拔賢任耆孩養無告仁滂施厚皇帝神  
聖通達今古聽聽視明一似堯禹生知法式動得理所  
天錫皇帝為天下主并包畜養無異細鉅億載萬年敢  
有違者皇帝儉勤盥濯陶瓦斥遣浮華好此綈紵勅戒  
四方侈則有咎天錫皇帝多參與忝無召水旱耗于雀  
鼠億載萬年有富無窶皇帝正直別白善否擅命而狂  
既翦既去盡逐羣姦靡有遺侶天錫皇帝寵臣碩輔博  
問遐觀以置左右億載萬年無敢余侮皇帝大孝慈祥

悌友怡怡愉惶奉太皇太后決于族親濡及九有天錫皇  
帝與天齊壽登茲太平無怠永久億載萬年為父為母  
博士臣愈職是訓詁作為歌詩以配吉甫

德勝頌

歐陽詹

唐貞元六年歲在庚午陰陽家流曰歲在午人馬食土  
人之所食也穀馬之所食也草今言食土明歲無嘉穀  
而野無青草則運數于茲合凶災之大者于是天尋舊  
步地轉恒軸交糾迴薄將有結于常沴自春二月至于


夏五月或赫日杲杲或密雲溶溶為焦灼為霖靈似不  
日而至皇帝宿布太和人神鳥獸魚鱉咸若騰歡心揚  
喜雲欣欣熙熙休氣中積決磅礴浮蒼蒼潛相憂磨力  
強者勝九陽構旱而莫展六陰作潦而不就氛祲靄為  
慶雲烈景皦為祥光油油薰薰宛復如春塊不破而雨  
足條無聲而風暢日者生氣欲凝淑氣猶競彼雖罔得  
為禍此亦未能為福徘徊相持時澤不降五稼含萌而  
待藝百芳蓄穎以思圻至是土膏融甘液宣若決渟泉

如聞湧烟豐本增岐芄芄縣縣無硤堦與良沃獲一十  
于百千賸疏雲直以委圖餘糧嶽峙而棲畝夫體病不  
能害心心平必能制體古人曰人者天地之心也既和  
且平則天地之病又焉得成歟况奔走游泳之物曰靈  
曰祗之類皆吁歛怡逸于其中乎宜其燎乾元之宿疹  
愈坤元之常疾以至于交泰如斯之盛邪古先帝王至  
聖則堯至仁則湯有黎甿以稱理厯水旱而莫禦豈不  
以道未全洽而德尚涼哉皇帝非徒能禦之又易之為

大慶殊祥其于道德可謂充塞洋溢光今而邁古矣元  
元嗚咽歌聖代者動天殷地以夜繼晝而其詞未宏輒  
為頌二章用貽于康衢庶事明而聲暢流乎無窮而以  
德勝目篇頌曰

歲在午天災于常昔人食土今我飫梁匪徒我飫梁鰥  
寡千箱盛矣乎我皇之德變耆為祥休哉德兮

歲在午天災斯屬昔馬食土今牛饜菽匪徒牛饜菽犬  
豕梁肉盛矣乎吾皇之德轉禍為福休哉德兮



文章辨體彙選卷四百五十七



欽定四庫全書

集部

文章辨體彙選卷四百五十九

詳校官中書<sub>臣</sub>李彤

主事銜<sub>臣</sub>徐以坤覆勘

總校官檢討<sub>臣</sub>何思鈞

校對官中書<sub>臣</sub>吳垣

謄錄監生<sub>臣</sub>陸鼎

欽定四庫全書

文章辨體彙選卷四百五十八

明 賀復徵 編

頌三

藉田頌

宋宋祁

皇帝再紀元之明年春二月率羣臣耕于東郊恤愍祀  
祈豐年也前此詔書示有司曰自我太宗襲熙厥功億  
神裕人宥命方國肖翹跂行亦莫不寧永惟土著之本

民夫之重乃躬藉田以倡農先震地房之滿胥導政  
之長懋柔嘉令芳于是乎孚盻嚮鹵莽滅裂于是乎復  
敦龐穗滯秉遺見糧如坻我真考因其累盛重以明德  
故能步師百萬狩醫間見武節高世八九升突遼建元  
封奉符隕祉以憶無極肆余承緒茲率厥典則熟蕭布  
幣固有常所監農狎塾厥存舊章惟一二執事率循而  
懋明之方春作時百穀革始姑使斯人悅羽旄之美重  
見漢官後嗣諗稼穡之艱不失夏物無贅聚儲峙無煩

勞供帳趣合于禮劬吾農馬前期則修飭神壇按除膏  
壤夷道如砥呼蹕填街捐護獮以護野雜荆年以守燎  
阡陌繡錯原隰龍鱗蒸膏冒楸協風回春于是旄頭先  
馳屬車齊躅奔星舞于旗旂行月捷于羽箠壽犀注鎧  
肅給乎師營蒼虬範馭遨游乎天轡瓊鉞流景金根照  
塗轡幕周張紈綃絳線既而揉耒剡耜載保介之間先  
種後稷庀播植之器官分無諉事具不教天子乃以丙  
午之旦升華輅繇大庭顏行山則銜枚無聲龍虎見象

堪輿犇警坐間闔切圓游乃彷彿乎曾城之外五精來  
同七聖景從鸞聲佩節次于帷宮上既淳濯圭潔儲聲  
淵默昧明乃聲大次款嘉壇索先農以享之因大積以  
配之血毛幽全金石鏗訇躬接妥侑加祠官之一等禮  
重沿襲具祖宗之遺意爾乃降靈場儼朱紘物覩于聖  
天健其行星田彌望紺轅儲駕洪縻序進王步有容三  
推成禮邇臣告脩上曰朕志在敦本寵其強力可以勸  
何憚于勤遂推而進之有司以義固爭璣十璣而後釋

乃始弭節容與御史觀耕之臺三公羣后班趨次耨靡  
然從風邁五踰九大農灑種庶人終畝官師扞行內天  
旋于時都人熙熙駐望皇軒或歌以壤或擊于轅不圖  
叢雲之旦復見東戶之年日華晏溫天心馮豫奉丰極  
御應門翔鷄樹竿墜鵠宣制大賚四海與之更始虧除  
威辟存問高年振淹修墜平徭闊賦中外百執告至而  
策勛踐過三更以差而賜帛膏以鮮雨鼓之巽風不崇  
朝而周萬國先是羣臣繹丕懿潤鴻名將琢之玉版納

于金匱至是則回雕輿坐前殿震照儀矩翕受典冊皇  
皇哉茲禮真帝世之希濶臣工之旦暮者與儒臣學于  
舊史竊明載芟之詩甸師之職在藉之誼有三說焉一  
典籍之常禮二藉履以親事三借民而治之所言雖殊  
要之毆天下之民棄末而歸本耳且古者謹嘗天廟申  
赦陽宮田之不闢辟在司徒作為御廩鍾而藏之其故  
何哉以為奉薦粢盛非無良農不如親之愈也誰督耘  
耔非無猛制不若勸之善也夫祭奠大于脩物物脩而

百神據之兵莫大于足食食足而四夷懷之人莫急于  
豐財豐財而有生聚之是三物之濟否在此舉也且周  
宣缺之戎軋其衰漢文用焉民阜其宜唐后勤止以豐  
易飢洪惟太宗光迪于前陛下述宣于後皇矣同底于  
道烝哉不隕其聲方且九扈勤民三事就緒凝凝其盛  
陳陳相因糧餘可提草殖弗興民一于耜家萬斯箱遂  
駕五帝軼三王奮甘寔而攄馨香也敢作頌曰

倬彼鮮原帝藉于田匪藉其勤我為民先悠悠春旗脉



土于畿陽膏澤澤邁乎三推有壬有林亦莫不祇我疆  
我理載耘載耔寔芑寔阜芾厥豐草田畯至喜祈年伊  
早我穀用成我倉既盈我倉耽耽鍾于東南其用伊何  
事神薦馨為酒為醴為粢為盛蒸之浮浮釋之漉漉上  
帝居歆降福孔休降福伊何我民既蕃室家溱溱三事  
不諼食足武奮震疊爾功蠻夷來同罔不率從帝猷昭  
升式于九圍兢兢業業以毖萬機在豐念匱在飫思飢  
子子孫孫勿替引之

慶厯聖德頌

石介

三月二十一日大昕皇帝御紫宸殿朝百官相得象殊  
拜竦樞密使夷簡以司徒歸第二十二日制命昌朝參  
知政事弼樞密副使二十六日勅除修靖素並充諫官  
四月八日皇帝御紫宸殿朝百官衍樞密使仲淹琦樞  
密副使乃用御史中丞拱辰御史邈御史平諫官修靖  
十一疏追竦樞密使勅十三日勅又除襄為諫官天地  
人鬼昆虫草木無不歡喜皇帝退蒞進賢發于至聰動

于至誠奮于睿斷見于剛克陟黜之明賞罰之公也上  
視漢魏隋唐五代凡千五百年其間非無聖神之主盛  
明之時未有如此選人之精得人之多進人之速用人  
之盡寔為希闊殊尤曠絕盛事在皇帝之德之功為卓  
犖瑰偉神明魁大古者一雲氣之祥一草木之異一蹄  
角之怪一羽毛之瑞當時羣臣猶且濃墨大字金頭鈿  
軸以稱述頌美時君功德以為無前之休丕天之績如  
仲淹弼寔為不世出之賢求之千古堯則夔龍舜則稷

契周則閎散漢則蕭曹唐則房魏陛下有之諸臣亦幸  
今天下之人望為宰相諫官者陛下盡用之此比雲氣  
草木蹄角羽毛之異萬萬不侔豈可翻無歌詩雅頌以  
播吾君之休聲烈光神功聖德刻于琬琰流于金石告  
于天地奏于宗廟存于萬千年而無窮盡哉臣寔羞之  
臣嘗愛慕唐大儒韓愈為博士日作元和聖德頌千二  
百言使憲宗功德赫奕煒燁昭于千古至今觀之如在  
當日陛下今日功德無讓憲宗臣文學雖不逮韓愈而

亦官於太學領博士職歌詩讚頌乃其職業竊擬于愈  
輒作慶厯聖德頌一首四言九百六十字文辭鄙俚  
固不足以發揚臣子之心亦欲使陛下功德赫奕煒燁  
昭于千古萬千年後觀之如在今日也臣不勝死罪臣  
賤無路以進姑藏諸家以待樂府之采焉

於維慶厯三年三月皇帝龍興徐出闈闥晨坐太極書  
開闔闔躬攬賢英手鋤姦桀大聲颯颯風震搖六合乾  
之動如雷之發昆蟲躡躅妖怪藏滅同明道初天地嘉

吉初聞皇帝感然言曰予父予祖付予大業予恐失墜  
寔賴輔弼汝得象殊重慎徽密君相予久予嘉君伐君  
仍相予笙鏞斯協昌朝儒者學聞該洽與予論政傳以  
經術汝貳二相庶績咸秩惟汝仲淹汝誠予察太后乘  
勢湯沸太熱汝時小臣危言業業為予司諫正予門闥  
為予京兆聖予讒說賊叛于夏徃予式遏六月酷暑日大  
冬積雪汝暑汝寒同于士卒予聞心酸汝不告乏予晚  
得弼予心弼悅弼每見予無有私謁以道輔予弼言深

切予不堯舜弼自咎罰諫官一年奏疏滿篋侍從周歲  
忠力盡竭契丹亡義禱杙饕餮敢侮大國其辭慢悖弼  
將予命不畏不懼卒復舊好民得食褐沙磧萬里死生  
一節視弼之膚霜剝風裂觀弼之心鍊金鍛鐵寵名大  
官以酬勞渴弼辭不受其志莫奪惟仲淹弼一夔一契  
天寔賚予予其敢忽並來弼予民無瘥札曰衍汝來汝  
寔黃髮事予二紀毛禿齒豁心如一分率履弗越遂長  
樞府兵政毋蹶予早識琦琦有奇骨其器魁礪豈視吾

楔其人渾樸不施剗剗可屬大事敦厚如勅琦汝副行  
知人予哲惟修惟靖立朝讞讞言論礪礪忠誠特達祿  
微身賤其志不怯嘗詆大臣亟遭貶黜萬里歸來剛氣  
不折屢進直言以補予闕素相之後含忠履潔昔為御  
史幾叩予榻至今諫疏在予箱匣襄雖小臣名聞予徹  
亦嘗獻言箴予之失剛守粹慤與修儔匹並為諫官正  
色在列予過汝言無鉗汝舌皇帝明聖忠邪辨別舉擢  
俊良掃除妖魃衆賢之進如茅斯拔大姦之去如距斯



脫上倚輔弼司予調燮下賴諫諍維予紀法左右正人  
無有邪孽予望太平日不逾浹皇帝嗣位二十二年神  
武不殺其嘿如淵聖人不測其動以天賞罰在予不失  
其權恭己南面退姦進賢知賢不易非明不得去邪惟  
難惟斷乃克明則不貳斷則不惑既明且斷惟皇之德  
羣下踧踖重足屏息交相告語曰惟正直毋作側僻皇  
帝汝殛諸侯危慄墮玉失舄交相告語皇帝神明四時  
朝覲謹修臣職四夷走馬陸鐙遺策交相告語皇帝神

武鮮兵修貢永為屬國皇帝一舉羣臣懾焉諸侯畏焉  
四夷服焉臣願陛下壽萬千年

會聖宮頌

歐陽脩

臣伏見國家采漢書原廟之制作宮于永安以備園寢  
欲以盛陵邑之克奉昭祖宗之光靈以耀示于千萬世  
甚盛德也臣永惟古先王者將有受命之符必先興業  
造功警動覺悟于元元然後有其位而繼體守文之君  
又從而顯明丕大以纂修乎舊物故其兢兢勤勤不忘

前人是以根深而葉茂德厚而流光子子孫孫承之無  
疆伏惟皇帝陛下以神聖德傳有大器乾健而正離繼  
而明即位以來于茲十年勤邦儉家以修太平日朝東  
宮示天下孝親執籩豆三見于郊日星軌道光明清潤  
河不怒溢東南而流四夷承命歡和以賓奔走萬里顧  
非有干戈告讓之命文移發召之期而犀珠象牙文馬  
鼓玉旅于闕庭納于廐府如司馬令無一後先至德之  
及上格于天下極于地中浹于人而外冒于四表昆虫

有命之物無不仰戴神威聖功效見如此太祖創造基  
始克成厥家當天受命之功太宗征服綏來遂一海內  
睿武英文之業真宗禮樂文物以隆天聲升平告功之  
典陛下夙夜虔共嗣固洪業纂服守成之勤基構累積  
顯顯昌昌益大而光稱于三后之意可謂至孝况春秋  
歲時以禘以祫則有廟祧之嚴配天昭孝以享以告則  
有郊廟明堂之位篆金刻石則有史氏之官歌功之詩  
流于樂府象德之舞見于羽旄惟是邦家之光祖宗之

為有以示民而垂無窮者罔不宜著陛下承先烈昭孝思所以奉之以嚴罔不勤脩聖人之德謂無以加而猶以為未也乃復因陵園起宮室以望神游土木之功嚴而不華地與而潔宇敞而邃神靈杳冥如來如宅合于禮經孝子馨咳思親之義愚以為宮且成非天子自臨享則不能以來三后之靈然郡國不見治道太僕不先整駕恬然未聞有司之詔豈難于勤民而遲其來邪特以龜筮所考須吉而後行耶不然何獨留意于屋牆構

築而至于薦見孝享未之思邪況是宮之制夷山為平  
外取客土鍛石伐木發兵胥靡調旁近郡如此數年而  
道路之民徒見興為之功恐愚無以識上意是宜不惜  
屬車之費無諱數日之勞沛然幸臨因展陵墓退而諭  
民以孝思之誠遂見守土之臣採風俗以問高年亦堯  
舜之事也古者天子之出必有采詩之官而道路童兒  
之言皆得以聞臣是以不勝惓惓之心采西人望幸意  
作為頌詩以獻闕下辭曰

魏我穹崇奠京之東有山而崧淵淪道源滙流而淵有  
洛之川川靈山秀回環左右有高而阜其阜何名太祖  
太宗真宗之陵惟陵之制因山而起隱隱隆隆惟陵之  
氣常王而喜鬱鬱葱葱帝懷穹昊授命我宋造初于屯  
帝念先烈用欣余家宣力以動赫赫三后重基累構既  
豐而茂燕翼詒謀是惟永圖其傳在予曰祖曰宗有德  
有功予寔嗣之克勤克紹以孝以報予敢不思惟此園  
陵先後之宅既宅且安后來游止弗宮弗室神何以驩

迺相川原迺得善地地高惟丘迺以荆灼迺訊龜寶龜  
告曰猷帝命家臣而職我事而往惟寅一毫一絲給以  
縣官無取于民伐洛之薪陶洛之土瓦不病窳柯我之  
斧登我之山木好且堅家臣之來役夫萬名三年有成  
宮成翼翼在陵之側須后來格有門有宇有廊有廡有  
庭有序殿兮耽耽黼帷襜褕天威可瞻庭兮植植鉤盾  
虎戟容衛以飾太祖維祖太宗維弟真宗維子三聖疑  
疑有以奠位于此而會聖兮在天風馬雲車其來仙仙



聖會于此靈威神馭其宮肅然聖既降矣其誰格之惟  
孝天子聖降當享其誰來薦亦孝天子孝既克祗而來  
胡遲其下臣脩作頌風之

青宮受寶頌

元虞集

天歷二年六月乙酉皇太子受寶于行幄臣等拜手稽  
首而言曰臣聞古之所謂能以天下讓者審幾于先事  
謂之至德既倦而庸巽謂之予賢是皆人道之常而未  
若今日之盛者也我皇太子以仁文之資知勇之德當

撥亂反正以續祖宗之統則躬當大難嬰犯霜露而不  
辭及功成治定既膺歷服之歸則推奉聖兄謙居儲貳  
而不伐剛明之斷堅于金石而無變素定之誠質諸天  
地而無疑求仁得仁若處固有樂道忘勢訢然無為此  
寔帝王之所難能古昔之所未有而卓然特見于前後  
千萬世之內者也臣嘗讀周易而觀于乾龍之象自潛  
至躍時升位易九五天飛中正極矣益進而上庸知退  
夫而孔子之贊上九曰唯聖人知進退之正言非聖人

不能及此噫孔子發此義于千五百年之前而昉見其  
事于聖代宗社生靈萬世無疆之福也於乎盛哉臣等  
幸以文學得脩延閣之顧問親逢盛禮爰敢作頌獻頌  
曰

於穆皇儲文武聖明於赫大帝受命輯成天運日行既  
明既健神交意孚曾是修遠帝載龍旂其行遲遲萬民  
徯來皇儲有思載思載瞻于廬于旅式好在原莫敢寧  
處風雨孔時道無游塵肅肅鑾車通宵及晨帝曰勞止

母趨行邁會言近止交喜更慨灤陽之京世皇所營我  
母即安次于郊垆有豐草雨露既渥差垆于牧繁纓  
濯濯皇儲攸止百靈具扶羣臣受詔奉寶來趨維時范  
金龍光上燭匪舊以新景命攸屬寶來自南追琢有章  
卿雲隨之五色景芒有親有尊有友有愛以承武皇聖  
孝斯在古人有言兄弟家邦咨爾臣庶於乎勿忘史臣  
作頌丕昭盛德既壽以昌子孫千億

平江漢頌

明宋濂

天命皇帝為億兆生民主旌麾所向悉臣悉庭初以一  
旅之師興濠泗間遂撫淮南平江東攻浙東西下之版  
圖所入方數千里定都江左發政施仁戴白之叟垂髫  
之童涵泳至化皞皞熙熙如承平時于時陳友諒據有  
江漢之地僭居大號賊殺其主修蒙衝虐驅烝黎如蹈  
水火不自度力又集蜂蟻之衆直窺豫章三月不解皇  
赫斯怒乃召羣臣于庭而告之曰友諒不道敢屢予侮  
昔者蕩搖我邊方侵軼我姑熟伺偵

耻慶切  
候也

我金陵賴

爾一二臣隣之力攻而敗之予亦親覆其穴巢中宵竄  
走假息武昌予不忍追殲之冀其悔禍以自逭于天刑  
癸卯之夏乃復圍我豫章是其凶德無厭自取殄滅此  
天亡之時天之明威予不敢不順唯爾熊羆之臣不二  
心之士尚弼予以成厥功羣臣曰都于是右丞臣達參  
知政事臣遇春帳前親兵指揮使臣國勝同知樞密院  
事臣永忠臣通海脩厥戎器簡厥師徒以俟七月癸酉  
上躬擐甲胄禡蘇龍江

禡祭也

帥樓船數百蔽江而上友

諒大讐解圍而逃丁亥與我師遇鄱陽湖之康郎山戊  
子上分舟師為十二屯命達遇春永忠突入賊陣呼聲  
動天地矢鋒雨集砲聲雷鉤波濤起立飛火照耀百里  
之內水色盡赤焚溺死者動一二萬流尸如蟻滿望無  
際已丑焚偽平章舟刈戮餘二千辛卯復酣戰賊將張  
定邊素號梟猛上親禦之將士皆死戰歷一二時遇春  
等左右夾擊殺士卒無算張中矢百餘而退潛保鞋山  
不敢吐氣我師亦據湖口扼彼喉衿列柵南北江岸置

大筏中流水陸嚴戒以候其發八月賊食盡遣舟五百艘掠糧都昌又為我大將所獲壬戌賊計窮冒死突出將上趨九江上命諸將一時俱合其大戰如戊子自辰達酉督戰益急友諒中飛矢斃于舟中癸亥降其衆五萬上命釋之不戮一人凱歌而旋舳艫相銜旌旗飛翻不疾不徐委蛇而來萬姓歡迎俯伏道左山川草木皆有喜色告廟飲至行賞論功賜遇春田若干永忠田若干其餘將士賚金繒有差臣稽在昔曹操治水軍八十



萬來攻孫權而周瑜黃蓋敗之于赤壁符堅發長安戎卒六十餘萬騎二十七萬以侵晉而謝玄謝石乃敗之于淝水然赤壁不過一焚而走淝水亦不過軍亂而奔初未嘗大戰也而史臣具書之以為千古美談矧今湖口之捷血戰累日天地為之晦冥日月為之亡光山河為之震蕩其神功駿烈炳耀鏗鐳與天無極較之二國未足多讓而詩詠不作非甚闕典歟臣謹脩著其事誤為詞頌一通以流鴻績于無窮以俟太史氏之采錄云

其詞曰

天眷有德寔為哲皇肆其神畧以靖寇攘義旄東指罔  
敢弗恭風烈虎嘯雲游龍驤長淮既歸江左攸屬浙之  
東西樹侯置牧乃建國家以奠南服以懷中原以控西  
蜀蠢爾小醜敢讐大邦集其凶頑鋒蝟虎蟾輕涉我疆  
以跳以踉亦既翦刈僵骸覆江洊齊六軍直傾其穴釋  
而勿誅俾自懲刷闔胡不然復豕而啗翹其蟲臂當吾  
車轍皇明震怒歷告在廷是決不悛命將徃征爾選舟

師爾整甲兵漕爾糗糧各傾爾誠搖光在中夷則之月

禡牙江濱皇秉巨鉞以誓以戒以速其發紀律精明颺

火奮激旗旄揚揚舳舻將將

解漢江切

矛戈洸洸鎧冑明明

載怒載厲載飛載颺雄威所吞已無荆湘既與賊逢大

行衝擊藥騰藜駁星流火戟電轟巨轟雷劈殺氣

冥蒙不辨咫尺矢鋒所貫什伍聯聯縱橫交紐命隕弗

顛攢梳湊颿筍束蝟編流尸塞川舟行勿前彼魄既褫

扶創而逸聚于湖奧僅存喘息我方植柵江之南北大

箴在流掩蔽如翼越歷四旬飛走途窮將冒萬死以絕  
其衝我既見之千艦如龍似兔之走而鷹之從酣戰六  
時由辰達酉僕姑一發

僕姑失名

殪此酋首貫睛及顙仆若

枯柳大慙既除餘不能醜遞相告言我誠不振我革我  
頑我歸至仁誰謂培塿可高嶙峋再拜稽首來降來臣  
皇曰俞哉汝俘予受宥汝弗劉予汝父母汝凍予衣汝  
飢予哺昔何昏迷今始撤部奏凱而旋騎吹鬱搖形于  
樂歌節以鐺銃飲至于廟頒賞于朝帛堆其家肉登其

庖都人聚觀舉手加額或歎或謠有聲嘖嘖干戈相尋  
匪一朝夕自今昇平可坐而笑惟皇神武動則克之羣  
策盡屈四方式之惟皇寬慈降則釋之義聲動盪疇能  
敵之惟皇明斷遇事即決洞見千里不隔一髮所以四  
征成此駿烈小大畢朝孰敢肆孽在昔赤壁泊乎合肥  
事以幸集尚傳策書況茲之功俊偉赫熹揆古無讓可  
無詠詩臣雖微賤文字是職對揚皇休并獻臣臆三代  
以還用仁興國皇宜遵行永作民極

膏露頌

宋 濂

洪武二年冬十月十有三日甲戌膏露降于乾清宮後苑蒼松之上皇帝勅中官折示禁林諸臣光潤如酒凝結如珠昉白飴甘彌布松柯馨烈之氣鬯達左右勃鬱淋漓熏涵太和天休震動中外嘆嗟又明日丙子上御外朝左丞相宣國公臣善長帥羣臣稱賀上若曰甘露之降載在往誅然休咎之徵當以類應朕惡足以致斯卿等尚明為朕言之參知政事臣稼對曰聖人之德上

及太清下及太寧中及萬靈則膏露呈瑞陛下敬恭天  
地輯和人民故天不愛道而嘉祥徽顯也起居注臣觀  
對曰帝王恩及于物順于人而甘露降陛下誕寬民賦  
衆庶驩豫底于敕寧神應之臻職此故也翰林侍講學  
士臣素對曰王者敬養耆老則甘露降而松柏受之尊  
賢容衆則竹葦受之今露降于松則陛下養老之所致  
也宜以制幣策告宗廟頒于史館以永億萬年無疆之  
聞上情存損挹皆推而不居言既已丞相帥其班以退

翰林學士臣濂竊伏自念氏北有星名為天乳若明而  
潤則膏露下焉王者德格于上恩覃于下靈氛充牣秘  
貺斯甄此天人感應之常理也欽惟皇上興自臨濠匹  
馬渡江十五年間遂成帝業天瑞育滋不一而足彩霞  
成鳳卿雲聚繡赤烏飛翔白兔俯伏瑞蓮並拳嘉禾孕  
丈寔皆天之所命非人力所致而自至者今又睹茲聖  
徵則其德洞淪冥功成不宰三瑞沓至千休滋動有不  
期然而然者矣雖然傳有之受命不于天于其人休符



不于祥于其仁所以孔子之作春秋祥瑞不書而有年則書豈不以天道玄遠難知而人事之為可徵者乎皇上以天縱之聖留神至治以得仁賢為瑞以五風十雨為祥視彼前代植金莖以承液夸嘉瑞以紀年者未嘗不指以為戒則其英明之識超絕之智卓冠百王為法萬世是宜美盛德之形容播諸樂歌被之管絃以示聖子神孫于無窮云其辭曰

上天降康甘露之灑於粲其英純乾發自陽以布于下

方凝于休祥其祥伊何靈氣孔多有甘者液載仁推澤  
潛靈是錫誕啓皇之德天地相合鴻休翕集厭厭浥浥  
紛紛密密匪隨日以食兆厥聖微如卿之雲如景之星  
如日之重輪冲和氤氲以文我太平惟皇之聖貞符自  
應不卑而泳不高而迎蓂祿之攸盛惟皇之明貞符爾  
承不歆而傾不怵而盈蓂祿之攸寧休慶之即四國之  
式有濯厥聲耀于千齡

祀方丘頌

劉基

維洪武三年五月二十日戊申日北至皇帝將祀地祇  
于方丘乃先期九日潔齋于舊宮詔百僚集射西苑命  
之曰古人有言惟德動天惟誠感神故射以觀德誠于  
中者必形于外不可掩也惟爾庶官各一乃心以致其  
誠毋替朕命羣臣自左丞相宣國公以下至于有司百  
執事皆拜手稽首曰敢不敬承天子之明命維大江之  
南土每夏四五月多霖雨少霽是歲雨作連日至十有  
七日乙巳皇帝御法駕率百僚告于太廟遂居于齋宮

雨勢未已至丁未日夜三鼓有風徐來淋潦頓收微月  
出雲氛霧廓清皇帝被袞冕登壇萬籟無聲華燭有輝  
雅樂瀏亮燎烟不搖百禮既洽千官肅雍洋洋乎神明  
臨之在上誠意懇至升降秩秩濟濟翼翼穆穆如也比  
明竣事薰風應節和氣交暢小大咸喜知誠德之感格  
若合符契大命所集皇天后土信不忒也于是弘文館  
學士臣基謹獻頌曰

濬哲維帝父天母地維孝維誠斯承其意孝誠既脩物

以將之神鑒在德匪惟其儀聖不世出禮失莫求弗澄  
其源曷清其流末流之極禮儀並廢豈無牛羊而不以  
祭穹祗赫怒監觀萬方式昭大命命我聖皇維我聖皇  
克孝克誠提三尺劍由一旅興奮于長淮長淮具宗濟  
于大江大江攸同漢沔既朝閩浙率從施及廣海化外  
之邦望風占雲獻其琛寶稽首龍墀蹈舞從容乃命虎  
臣越濟踰河雲旆霓旌鐵馬金戈蹴踏泰岱憑陵華嵩  
鋤秦鏟燕掃貉滌戎莫亢我前莫膺我鋒斬逆懷降允

協天衷自西自東自南自北罔不懌懌戴天子德天子  
之德格于上下既禋于郊又敬于社人懷其仁神錫之  
嘏圓方所包無不服者超黃邁唐越商踰夏小臣作詩  
以繼大雅

瑞麥頌

劉基

天厭元德九州麋沸羣猾並作黎民惶惶奔走無路皇  
帝提三尺劍奮起草萊指顧之間豪傑景附矛鋒所向  
戰克攻取皇帝心知天意之有在爰舉有衆以與萬姓

請命一征而取荆襄再征而清江浙三征而閩海率從  
四征而席卷全齊五征而定周及梁遂取秦晉舉燕趙  
南交北貊東夷西羌海外之邦莫不望風遣使奉朔稱  
臣拜伏闕廷于是民獲所歸上下神祇咸有依托慶雲  
甘露游奏禎祥帝心謙抑每讓弗居洪武三年五月陝  
西寶雞縣進瑞麥一莖五穗者一本三穗者三本兩穗  
者十有餘本蓋自兵興以來王保保據周宋李思齊張  
思道據秦晉燕趙齊梁之間大豪小猾或憑城郭或聚

山寨皆假元為名分割境土擅兵相攻于是燕晉周秦之地彌數千里連歲無雨百穀不生民相殺食且盡今年夏四月王師奏捷于蘭州朔漠掃清關隴底定天乃大降甘雨滋為嘉瑞和氣致祥不亦昭哉周頌有曰綏萬邦屢豐年天命匪懈傳者謂商之季年比歲旱荒至周武王克紂受命而天下遂獲豐年由今觀之信非誣矣漢謠以麥穗兩岐歌其太守之美政則是兩岐之麥世所希有而況于三岐以至五岐者哉頌聲之作弗可



闕也頌曰

神雀赤鳥其羽不可以為儀紫芝甘露其寔不可以療  
飢豈若五穀之為瑞可以厚民之生豐國之資者哉元  
失其鹿天下共逐擾擾紛紛強食弱肉皇天震怒誕命  
真主肅將天威以靖區宇騎士如雲猛將如龍發縱指  
示悉出帝衷既平南東遂定西北民居攸奠品物咸植  
爰有嘉麥一本五岐布葉萋萋結實離離既齊既平先  
百穀成擢穎揚芒金支翠英溥彼原田瀚若雲烟望之

油油卽之芊芊其種伊何降自穹旻其瑞伊何豐年之  
兆豐年穰穰頌聲洋洋其始自今奕世無疆

河清頌

鮮緡

臣緡承詔總修大明太祖聖神文武欽明啓運俊德成  
功統天大孝高皇帝寔錄自渡江七年辛丑冬十一月  
三門磧下黃河清實啓聖之徵帝業由是遂成明年平  
江漢又明年服荆楚又明年定兩浙又明年克姑蘓廓  
清中原四表寧一廼卽帝位紀元洪武之年三門磧黃

河復清帝業由是而盛高麗來朝為海外諸國先殊方  
接武而至逾三年皇帝陛下重華協德瑞應同符紀元  
永樂之二年冬十二月戊辰朔十七日甲申三門磧下  
黃河清先是榮光燭天隱隱紛紛倏然捲收洞徹見底  
淪連五彩間日迭耀乙酉之旦河兩傍近白光蕩滉如  
金鎔如鉛如汞如玻璃色悠漾不定素練捲而掣之也  
居二日有玄文如綃輕幕水上如犂雲隱空已迺若漆  
光可鑑黝然靜深非涅而緇洞絕渣滓又二日乃見濃

綠又如翡翠如青琉璃如遠山黛繞磧下如蒼虬翠蛟  
飛舞於流荇丈藻之間望之而可掬也二日後如朝霞  
映日紅雲上波初陽迤邐花卉紛披倏如胭脂浮流薄  
膩一洗下見沙石如芙蓉丹砂燦然都列於耀瑜錦綺  
之間可指而數也後二日如泥金霏屑隱約浮沉流薄  
彩鳳羽毛鱗鬣泳飛潛動金芝暈文琮玉在鍊錯雜斑  
映瑩無纖塵又如築琥珀以為堤釀金香而注之也已  
迺微碧與天一色橫渡亂流者扣舷鼓枻洞見眉髮疑

若步空虛凌倒影挽銀河而下之也于是夾河觀者毫  
俛歡呼曠古罕遇自河津傳播于晉絳之人相率來觀  
肩相摩也自韓城播告于秦隴之人觀者扶攜背項相  
望足相躡也四方之人行旅過之莫不為之驚喜嘆息  
閱玩坐起徘徊而不能去者晉高平王遣使馳奏之繼  
而吏民報至皆圖其狀秦王上表賀獻圖與晉人克合  
于是羣臣上表永樂三年春正月戊戌越十八日乙卯  
廼復其舊寔三旬有二日按所上圖咨詢羣言既審同

異恭惟皇帝陛下謙抑弗居謂何德臻茲稱太祖高皇  
帝神靈然自陛下即位以來四方萬國之外感恩慕德  
高麗日本安南占城暹羅爪哇西洋琉球真蠟拂林覽  
邦緬甸波勒迤比兀良哈女真野人西番哈梅朶耳烏  
思尼巴天竺否名不約咸至于庭瑞應大來震動天地  
不可掩抑太平之業將由是而極臣縉職司紀載歡欣  
無已謹拜手稽首而獻頌曰

天啓聖明休命赫奕洪河屢清龍門之碣昔在太祖廣

運神武銀河昭回洗滌九土洪河孔神佳氣協順應茲  
昌運歲在辛丑雲雷邁速河清獻瑞既肇龍門天戈所  
指六合風靡景貺朝宗如河之水功德格天即位紀元  
龍門河清應于明年東夷始服三陟接踵如何奔趨有  
赴無壅我皇繼統永樂紀元龍門河清亦越明年惟此  
龍門神禹所闢功在生民宇宙無極惟茲瑞應先後同  
符太祖在天昭昭不誣禹功帝德世萬世億帝德禹功  
與河俱東河源崑崙太古積雪九河駁奔濺目沃鐵關

石迴瀧盤東地底龍門天開弦激蜩起衝奔九地威電  
走影聲喧怒雷淖汨沸鼎經緯天文橫絕地紀貫一百  
川羅絡萬里五行之生莫先于水四瀆之列莫大于此  
于此考祥粵古是常昭茲大運塞其榮光虹飛雨翳露  
密霞流倏陽忽陰乍闢乍收其騰氤氲其下續續其旁  
囷囷其隙紆紆海市青紅仙神艷淑馭鳳驂麟朝暉若  
木轉盼一空伏波凝席沈沙躍金堊壤薦壁驚鷗鷺羣  
下顧毛羽隔岸見魚空行曳尾星垂芒耀月影夾鏡倒



浸迴光動植交映既白既玄翕忽丹青黃旗紫蓋春卉  
秋英五方歲融五緯宣精五運合一五彩流形事有絕  
世久而後應物有絕倫久而後盛地闢天開多歷年所  
堯舜重華卓冠萬古草木咸若卿雲爛垂干羽苗格蕭  
韶鳳儀于時河清榮光既塞不游不驚貢賦絡繹翼通  
島夷夾右充導九河轉輸濟潔浮于積石龍門會于濯  
汭匪緩而渟曷勝舟載盈變謙流時移變易不有來今  
曷知古昔於昭大明聖聖相承殊音重譯日造在庭充

舜惟欽我皇日敬寤寐丹書典謨金鏡祥謂不祥聖不自聖惟謙受益惟人無競河流載清尚或如帶聖壽齊天萬世永賴河流載清龍門如礪聖德回天永賴萬世

嘉禾頌

解縉

洪武二十八年秋九月壬辰朔庚戌北平永清衛之龍門禾有異莖同穗之祥其三幹合為一仍三穗者二二穗合為一仍二穗者六是歲大熟今皇帝遣使來進羣臣表賀太祖聖神文武欽明啓運俊德成功統天大孝

高皇帝親御墨為詩一章以賜今上皇帝其詩首言創業之艱天命之不易除暴禁亂之師撫民致治之畧中言天錫豐登之屢史書垂示之嚴明堂裡薦之重末示謙冲戒謹之意為善不足之誠大矜下民之惠與民同樂之盛心溢于言表蓋不以嘉禾之祥為可矜而以為可懼而思以自勉聖不自聖兢兢業業足以垂訓于千萬年今上皇帝服膺聖訓念手澤之存諷誦追惟不能自已乃永樂三年九月朔旦用摹勒于石拓本裝治成

軸分賜諸王及近臣于是臣縉亦得與賜焉又適有嘉  
禾之瑞臣縉仰惟日月之光華昭著于天地其溢而上  
者為慶雲為景星為霞五色其下者為璿珠為美玉為  
丹砂使人歆慕而寶愛者皆日月之餘光也古先聖帝  
明王有日月光華之德其禮樂文章風流遺韻之傳若  
詩書所刻百世之下光景常新猶足以使人歆慕與景  
星慶雲諸福之物同一快觀而况身被其澤目覩其盛  
鼓舞涵濡其有不發而為華封之祝康衢之謠以自鳴

其慶幸之萬一乎寔人情之所不能自己也拜手稽首而獻頌曰

洪武乙亥秋穀登朔方龍門嘉禾生三穗二穗交兩騰異本同類同敷榮蕊珠金粟隔露凝親藩錫貢來神京玉匣上有黃雲蒸袞衣當日御彤廷百辟欣嘉陳休徵四野歡呼傳頌聲帝曰俞哉稽之經旅命歸禾凜不矜作詩致戒尤丁寧昌言受命畏天明降福穰穰恐弗勝庸錫親藩鍾聖情亦知玄德由茲弘十年事驗天威靈

聖孝通天推至誠永樂華重信有禎賜詩日閱心屏營  
手澤猶存訓服膺每御翰墨懷牆羹想當睿思玉几憑  
智周八極通杳冥重念稼穡憂農耕寒暑怨咨憐獨熒  
祗願年登百穀成羣臣環列忭且驚百神降監來軒盈  
雲霞灼爍飛陶泓鴻章聖藻驅風霆造化萬彙皆流形  
工巧人為何足稱奎章爛爛不可名但見東壁餘光精  
刻以瑞溪紫玉膜摹本裝以龍鸞紋頒賜羣臣荷寵榮  
天球大訓河圖并人文至寶奠八紘夜夜虹光燭太清

聖子神孫萬億齡萬世黎民歌太平

文章辨體彙選卷四百五十八